

1 KORIN KORINMBA LA NIMBA KAT POL PILIWUTA KITA WAN PAS

¹ Wun Pol wun. Wan pas wunayi piliwutiga. God ndina maawupmba wandi maa aposelat tiwun. Mbambala Jisas Kraistna njivwa kwuka ndina aposelat tigowun. Nina kita mbaapma nyan sostenis wunogwinala ligandi. ² Ngwuk Korin walinja ngepmamba liga Godna mbaapma nimba ngwuk kat wan pas piliwutigowun. God wandi maa ngwuk Kraist Jisas nogwinala kita vak yetiliga nimba ngwuk. Ngepma ngepmamba liga nimba Kraist nina njambwi nyana waawaliga nimba ndi. Kraist ndina njambwi nyana. Ninogwi nina njambwi nyana. ³ Nina nyaek Godno nina njambwi nyan Jisas Kraistno ngwuk kat awagapma apma vat kwimbangat wowun. Kwimbit maa ngwutna maawut apma vat tigiyanidi.

KRAIST NIN KAT APMA VAT YILINDA VAT

⁴ Nandinya nandinya God kat ngambuliwa nandinya ngwuk kat yelavitaa sivu kiligowun. Ngwuk Jisas Kraistna kita mbaapma nimbat tingwuk mala God ngwuk kat apma vat yindi. Apma vat yinda vak vilaa sivu kiligowun. ⁵ Kraistna kita mbaapma nimbat tingwuk mala God ngwuk kat kwovak kwovak apma vat kwindi. Wan vak kwindi mala ngwutna maawut apma vat kwindi. Wan vak kwindi mala ngwutna maawut apma vat yelavika apma nyaangit mbutigangwuk. ⁶ Wan Kraistna apma nyaangit

ngwuk kat mbutnin mala ngwuk wutaa apma vak yelavika maawupmba kwutaa lingwuk. ⁷ Mbambala God kwiya vak ana vilevigiyangwuk. Tamba aywaa klangwuk. Tiga liga nina njambwi nyan Jisas Kraist ngaga yaiga njimbla kat kawiga ligangwuk. Ndi kat vivat kawiga ligangwuk. ⁸ Jisas Kraist ngwutna maawut kwunapmak kat tigandi. Ngwutna maawut manda kat kwunapmat tigandi. Wan apma vat kwutaa lingwa vak kwagalalangwuk walaa kwunatigandi. Tiga liga nina njambwi nyan Jisas Kraist yaiga njimbla God ngwuk kat vilaa waigandi. Ngwut kavle nimba ana ngwuk. Ngwuk apma vat tigangwuk waa waigandi God. ⁹ Viga liganin. God wupma yigiyandi. Ndi woseka ana waligandi. Tak God ngwuk kat wandi. Yagwa nuwula. Wuna nyan ngwula njambwi nyan Jisas Kraistnogwinala kita vat yetingwula waa wandi God. Wan yaiga njimbla nat vak ana waigandi.

MBAAPMA MBAAPMA YINDI

¹⁰ Kita mbaapma nimba nugwk kat kita knyaangit mbukiyowun. wan nyaangit wuna yelavik vapmba na mbukiyowun. Jisas Kraist waa nyaangitna mbukweya. Awat sowat wana walea lingweya. Kita vat kita mbvaapmamba yeti ngwula. Mbaapma mbaapma yiga wana walea lingweya. Ngwuk kita vapmba yelavika yeti ngwula. ¹¹ Nat nimba klowina ngayмба la nimba wun kat yalaa awat sowat walea lingwa vat mbutndi. Kita mbaapma nimba ngwuk. Manda kat walea ligangwuk. ¹² Wupma wandi ngwuk wangwa vak. Nat nimba kupma

waligandi. Nin polna mbaapmamba liganin waa waligandi. Nat Polna mbaapmamba liganin waa waligandi. Nat nimba kupma waligandi. Nin Apolosna mbaapmamba liganin waa waligandi. Nat nimba kupma waligandi. Nin Pitana mbaapmamba liganin waa waligandi. Nat nimba kupma waligandi. Nin Kraistna mbaapmamba liganin waa waligandi. Kapma kapma nyaangit waligandi. ¹³ Manda kat Kraistna mbaapmamba kita vat tingwa vak kwagalalaa mandit mandit mbaapma silingwuk. wan vak apma vak ana ndi. manda kat wupma walindi. Nin Polna mbaapmamba liganin waa. Ndi kat tiga diwai krosmba wunayi kiyaa? Kai luwa. Wuna simba ngu yagundi? Kai luwa. ¹⁴ Ngwutnogwinala tiwa njimbla nima sakwat nimba kat ana ngu njangiwn. Vililik nyan kat mina ngu njangiwn. Mbitna si Krispaso Gaiaso. Nima sakwat nimba kat ngu njangilapman tiwangat solat siligowun. ¹⁵ Ngwuk kupma walngwuk. Nin ngu yagulaa Polna mbapmat wuleinin waa walnguk. Wan nyaangit ana nglaatndi. ¹⁶ Ngwulogiwnala ngu njangiwa nat nyan kat wuna maawut tivindi. Ndina si Stefanas. Ndi kat ngu njangiga ndina ngayamba la nimba kat njangiwn. Nat nyan kat ngu njangiwn? Ana yelavikowun. ¹⁷ Kraist wun kat ana wandi. Ndi kat yiga ngu njangi mila waa ana wandi. Wun kat wandi. Ndi kat kan apma nyaangit yiga ngambu mila waa wandi. Wandi maa wan apma nyaangit yiga mbukwun. Wan ngambuwa vat kaawa viyaa ngambulinja nyaangit vla ana ngambuwn. Wan apma nyaangit kwosavagu ngambuwn.

Kaawa ngambulinja vak vla ngambuga ngwuk kat kwutlapmak kat kai wowun. Kraist kiwai krosmba ngwuk kat walaa kiyaa vak ngwuk kat kwutlandi. Wunai wa kwundi ana kwulatndi. Kaawa viyaa ngambulinja nyaangit vla ngwu kat ngambugewan Kraist ngwuk kat ya vak kat ana yelavikengwuk.

KRAIST KWONDUO LIGA GOD YELAVIK VAK SIMOGWILIGA NYANA

¹⁸ Kavle vat yiga yetiliga nimba Kraist diwai krosmba kiyanda vak kat wuka yelavitigandi. Wan nyaangit ana nglaatndi. Tungwengwan yiga walinja nyaangit vla ligandi waa yelavitigandi. Nin God kwunatiga nimba nin wan nyaangit wutaa wan nyaangit tagula nyaangitna. Godna kwonduo liga nmyaangitna waa yelavitiganin. Kan nyaangit kaawa viyalinja vak vla liga nyaangit waa ana yelavitiganin. ¹⁹ Wan vak kat tamba God waa nyaangit tamba piliwutndi.

God wandi. Wowun maa nin nambuio liga
nimba nin
waa waigaa nimbana yelavik vak kwo vatna
tigaiyandi. Nin savagu maawutno liganin waa
waiga
nimba kat wun ndi kat kwulakiyowun waa
wandi God

waa tamba piowutndi. ²⁰ Mbambala nambuio liga nimba kwo vatnat tindi, lindi maa viliganin. Savagu maawutno liga nimba kwo vatnat tindi, lindi maa viliganin. Kaawa viyaga nat nimba kat kwulatiga nimba kwo vatnat tindi, ligandi. Ndina yelavitiga vat apma vat tagula vat ana ligandi, viliganin. God yelavitingwa waa walingdi.

²¹ God ndina maawupmba yelavita ndinyangu kat kavle maawut yelavipmbandi walaa kwutndi. Ndinyangu ndinai yelavika yetigiyaa vapmba God kat ana vigiyandi. Ndinyangu God kat nat vapmba vigiyandi. God ndina kavle maawuk kat kwunatndi ma nat nimba kat mbutina apma nyaangit wutaa ndina maawupmba yelavika kwutaa linjeyan God ndi kat kwunakiyandi. Wan mbutina nyaangit nat nimba wutaa tungwengwan yiga wlanija nyaangitna waa waligandi. ²² Nat nimba nat kavle vak kat yelavika liligandi. Juda ndi wupma yelavika liligandi. Nima njivwa simogwi liga njivwa kwukngweyan ngwutna nyaangit wukiyanin waa yelavika liligandi. Juda ana ndi nat nimba kupma yelavika liligandi. Apma nabuo liga mbukngweyan ngwula nyaangit wukiyanin waa yelavika liligandi. ²³ Wan kavle vak kat kwutapman yetiga nin mbutiganin. Kraist ngwuk kat walaa diwai krosmba kiyandi waa ndi kat mbutiganin. Wan nyaangit Juda wutaa ndi kai waligandi. Juda nan ndi nat nimba wan nyaangit wutaa tungwengwan yiga wlainja nyaangitna waa wlaindi. ²⁴ Kavle vat yelavitinja vak nin wupma ana yelavitiganin. God nin kat wandi. Wuna mbaapmat yaingangwuk wandi. Tat nina nat nimba Juda ndi. Nina nat nimba Juda ana ndi. Nin wupma yelavika liganin. Wan nyaangit Kraistna nyaangit apma nyaangitna. Kraist Godna kwondu visimogwiligandi nin kat. God yelavika liga vat Kraist nin kat mbutigandi waa yelavika liganin. ²⁵ God nin kat kwunatiga vak kat wutaa tungwengwan yiga linda vatna waa

yelavitigandi. Nin wupma ana yelavitiganin. God nin kat kwunatiga vak ndinyangu nambu linja vak kat kwulatigandi. Ndi yelavika linjan Godna nyaangit kavle nyaangitna. Tagula nyaangit anandi waa yelavitigandi. Godna vak yetinja tagula vak kat kwulatigandi.

²⁶⁻²⁷ Ngwuk kita mbaapmamba lina nimba yelavik ngwula. Wan njimbla God ngwuk kat yagbwa ngwula wanda njimbali ngwuk nambu liga nimba ana ngwuk. Nima nimba ana ngwuk. Wan njimbali njambwi nimba ana ngwuk. Nat nimba God manda kat kwo nimba kat mina yagwa ngwula waligandi. Njambwi nimba God kwo nimba kat yagwa ngwula walignadi. God kwo nimba kat yagwa ngwula waa wanda vak vilaa njambwi nimba kat yagwa ngwula waa wanda vak vilaa njambwi nimba njambwi tina vak God nin kat ana viga ligandi waa yelavikiyandi. Ndi wupma yelavita wup yiga ligiyandi. ²⁸ Wan kipmana kwo nimba kat kwusovat yagbwa ngwula wandi God. Ngi kat tiga wan kipmana njambwi nimba kwovat nat tindi, ligandi. ²⁹ Kita nyan God kat wun nima nyan tiwa vak kat vilaa God wun kat yagwa wandi waa ana waigandi. ³⁰ God ngwuk kat kwutaa ndina mbaapmamba taagandi. Mbambala Kraist Jisasogwinala ngwuk kita vat yetiligangwuk. God nin kat Kraist kat kwindi. Mbambala nina maawupmba tindi mala savagu maawut yelavitiganin. Kavle vak yetilina vak kat Godna kimbut maawut Kraist kwunatigandi. Tiga liga God nin kat vilaa waligandi. Ngwuk apma vat yetiligangwuk waa waligandi. Nin Godna nimba nin. Tamba yetinin wan kavle

vat nin kat ngilaa lindi. Mbambala Kraist nin kat wan kavle vak kat njalatndi. ³¹ Mbambala liga vat tamba God wandi, piliwutnja vatno kita vat mbit. God wandi. Kita nyan nima nda kat wavat wandeyan ndina nda kat ana waigandi. God kwukna nima njivwa kat waigandi. God kwukna njivwa nima nglei nda waa wandi God waa tamba piliwutndi.

2

KRAIST DIEAI KROSMBA KIYANDA NYAANGIT

¹ Kita mbaapma nimba, tamba ngwuk kat God waa nyaangit kiyawun. Nima kaawa viyaga nima kwundimba waga ana wan nyaangit mbutiwun ngwuk kat. Kao mbutiwun ngwukkat. ² Nat nimba kaawa viyaga kwulapmak kat mbutga vak vla ngwuk kat mbupmak kat kai wowun. Jisas Kraist kat mina mbupmak kat wowun. Ndi kiwai krosmba kiyanda vak kat mina yelavika mbutiwun ngwuk kat. ³ Ngwuk kat yalaa nimamba ana waliwun. Wun vaaka liga nyan vla liga mbutiwun. Wun ava plalindi, vaaka liga mbutiwun ngwuk kat. ⁴ Wan kipmana nimba nambu linja vla liga wan nyaangit ana mbutiwun. Nambu liga nyaangit ana mbutiwun ngwuk kat. Mbutiwun maa Godna waagan ngwutnamba tavilaa nima njivwa kwutindi maa vingwuk. Vilaa wan Inyaangit kat ngwula maawupmba yelavika kwutaa lingwuk. ⁵ Wan kipmana nimba nambu linja vla liga nyaangik kat ana kwutaa lingwuk. Godna kwonduo liga nyaangik kat mina kwutaa lingwuk.

GODNA NAMBUMBA LIGA VAT

⁶ Nat njimbla nat nimba kat nambuo liga nyaangit mbutiganin. Godna waagamba yetiliga nimba kat mina mbutiganin. Wan mbutina nyaangit tipmamba liga nambuo liganjambwi nimbana nyaangit ana ndi mbutina. Kapma nyaangitna mbutina. Wan njambwi nimba ndi njambwi nyangu kat tinja vak kwo vatnat tigiyaandi. ⁷ Wan nambuo liga mbutina nyaangit God waa pagwula la nyaangitna mbutina. Tamba wan nyaangit pagwula lindi, dinyangu ana viga wuka lindi. Wan nyaangit God kipma ana kwuka lindi, ngini wan nyaangit mbukiyowun waa yelavitndi. Wan nyaangit nin kat kwutaa kwusolaa Godna mbaapmamba taagalangand. ⁸ Wan nbambala liga kipmana njambwi nimba wan nambuo liga nyaangit ana wuka lindi. Wuke yinjan apma njambwi nyan Kraist kat ana vatnyagendi. Ana diwai krosmba ndi kat kaalagendi. ⁹ Yinja vat tamba God ndi kat wandi, piliwutnja nyaangitnonala kita vak mbit.

Ndinyangu wan nambuo liga nyaangit ana wuka lindi.

Ndina maawupmba ana yelavika lindi. Wan apma

nyaangit God woviyaguga viga lindeya nimba kat

kwunatndeya nyaangitna

waa tamba piliwutndi. ¹⁰ Wan pagwula la nyaangit kan mbambala god nin kat tamba visimogiwndi. Ndina waagan nin kat kwindi maa visimogiwndi. Godna waagan Godna yelavik vak vilaa nin kat visimogwiligandi.

¹¹ Nino nina maawup yelavitneya vak wuka viligandi. Nat nyan ana wuka viligandi. Godna waagan God yelaviwuka viligandi. Nat nyan ana wuka viligandi. ¹² God nin kat kipmana maawut ana kwindi. Ndina waagan mina nin kat kwindi. Ndina waagan nina maawupmba lindi mala God nin kat kwindeya vat kwindeya nyaangit yelavika ligiyanin. ¹³ Ngi kat tiga kipmana maawupmba nambu liga nyaangit ana nat nimba kat mbutiganin. Godna waagan nin kat simogwinda nyaangit mina mbutiganin. God kwiya waagan maawupmba lindi ligiyaa nimba kat mina wan Godna waagana vak kat mbutiganin.

¹⁴ Kita nyan Godna waagan ndina maawupmba tilapman tindeyan wan nyan Godna waagan kwiliga apma vat ana klaigandi. Kalvak kat kai waigandi. ¹⁵ Kita nyan Godna waagano ligiyaa nyan ndi siga naguga waigandi. Kan vak kavle vat. Kan vat apma vatna waa waigandi. Apma vat savagu siga vat apma vatna waa waigandi. Apma vat savagu siga naguga waigandi. Nat nyan wandi mala ana waigandi. Kan vat kavle vat. Kan vat apma vatna waa ana waigandi. Ndina maawupmba yelavita ndi avla waigandi. ¹⁶ Tamba wan vak kat God waa nyaangik kat piliwutndi. Kita nyan wandi., ana God njivwa kwutndi waa tamba piliwutndi. Wan nyaangit woseka waga ana piliwutndi. Nina yelavik vak Kraist yelavika liga vak vla tiligandi. Ngi kat tiga nat nimba wiga nyaangitmba ana yiga yetigiyanin. Kraist yelavika liga vapmba yega yetigiyanin.

3

GODNA NJIṼWA KWUTIḠA NIMBA

¹ Kita mbaapma nimba, ngwutnogwinala liwa njimbal Godna waagan maawupmba tindi, ta nimba kat kbutiwa nyaangit ngwuk kat ana mbutiwun. Tamba la maawupmba yetila nimba kaat mbutiwa nyaangit ngwuk kat mbutiwun. Ngwuk God waa nyaangik kat kwutambilaa ligangwuk. ² Ngwuk kat mbutiwa nyaangit mat nyangu kiliga mwunya mbi vla lindi. Nima nimba kiliga tagula kikginda liga vla ana lindi. Wan tingwan njimbla apma nambuo liga nyaangit ana wuka lingwuk. Kan mbambala nimbun ana wuka ligangwuk. Ngwuk tamba la maawupmba yetila nimba vla ligangwuk. ³ Kan kipmamba liga nimba yetiliga vapmba yetilingangwuk. Awat sowat tipmwigwula yiga yetilingangwuk. Awat sowat waleaga yetilingangwuk. Yetilingwa vak kat vilaa kipmamba yetila nimba yetiliga vak vla yetilingangwuk waa ngwuk kat yelavitiḡowun. ⁴ Ngwula nat nimba kwupma waligandi. Nin Polna mbaapmamba liga nimba nin waa waligandi. Nat nimba kupma waligandi. Apolosna mbaapma liga nimba nin waa walingwa vak kat wutaa kipmamba yetilinja vak vla yetilingangwuk waa ngwuk kat yelavitiḡowun.

⁵ Ngwuk aywaa kan mbukwa nyaangit kat yelavik gwula. Apolos njambwi nyan ana ndi. Wun Pol njambwi nyan ana wun. An Godna njiṽwa kwutiga nyan li. Ana nyaangit wutaa ngwutna maawupmba yelavika kwutaa lingwuk. Wan kwutiliya njiṽwa God angat kwindi

maa kwutiga. ⁶ Anai kwutiga njivwa ambugat kwutnijan njivwa vla kwutiga. Wun mi sik ambugapmba tuliga nyan vla ligowun. Apolos ngu tula kandi nda kat salatiga nyan vla ligandi. ⁷ Mi sik tuliga nyan ngu salatiga nyan kwo njivwa mina kwutigambit. God wandi maa tunja mina sik waatigandi. ⁸ Mi sik tuliga nyan ngu salatiga nyan kat ana kwulatigandi. Kita njivwa kwutimba. God mbik kat wenga kwigiyandi. ⁹ Nin aywaa kita vat Godna njivwa kwutiganin. Ngwuk Godna ambugat kwutina kipma liga vla ligangwuk. Ngwuk Godna ngay kwutina ngay vla ligangwuk.

GODNA NJIVWA KWUTIGA NYAN NGAY KWUTIGA NYAN VLA LIGANDI

¹⁰ God wandi maa ndina njivwa kwutigowun. Ngwutnogwinala ngaykwutiga nimba vla ngwutnogwi kwutiwun. Wunayi tata kwuka kwalik tawlinja vak vla kwutiwun. Wuna kwupmba ya nimba ngayn mbao yaaw ngiga kwutiga nyan vla kwutigandi. Wan njivwa nin kwutninan apma vapmba kwutigiyanin. ¹¹ Godna njivwa kwutina vak ngay tawgqa kwutinja vak vla ligandi. God tamba kwaanlik tawndi. Wan tawnda kwaanlipmba ngay kwutiganin. Jisas Kraist God ngay kat tawnda kwaanlik vla ligandi. Nat nyan ana wan ngayna kwaanliknat tigiyanidi. Jisasna njivwa kwutiga nimba ngay kwutiga nimba vla ligandi. ¹² Wan ngayna njivwa kwutigiyaan nat nimba apma nda mina kalalaa kwutigiyanidi. Gol walinja kapa, silva walinja kapa, nima sanyo liga kambak klalaa wungi ndamba ngay kwukiyandi. Wan ngayna njivwa kwutigiyaan nat nimba kavle

nda mina kalalaa kwutigiyandi. Wi njik, nat yuwi, kavle mi klalaa wungi ndamba ngay kwutigiyandi. ¹³ Njambwi nyan yaiga njimbla kwutina njivwa yetina vak kat njambwi nyan siga naguga vigiyandi. Kita kita nyan yetilina vak kat God siga naguga vigiyandi. Wan njimbla ya vikiyandi kwutina njivwa kat. Kavle njivwa aywaa yamba vika ngiligiyandi. Apma njivwa mina kwo ligiyandi. ¹⁴ Kita nyana njivwa apma vat kwo lindeyan njambwi nyanndi kat apma wenga kwigiyandi. ¹⁵ Kita nyan njivwa kat ya vitndeyan apma wenga ana klaigandi. Ndi ndina mbangi ya ana vikiyandi. Ndi kwo ligiyandi. Wan nyan yamba vitindi, kavuk saguga klanja nda vla ligiyandi.

GODNA MBAAPMA NIMBA NDINA NGAY VLA LIGANDI

¹⁶ Kan vak kat ngwula maawut ke silawoka kwa-galaga. Ngwut Godna ngay vla ligangwuk. Ndina waagan ngwutnogwinala liligandi. ¹⁷ Ngwutna mbaapma nimba kat kavle vat yingweyan God ngwuk kat nima vak kavle vat yigiyandi. Godna ngay apma vat tigiyandi. Ngi kat tiga ngwuk Godna nimba apma vat tiga yetigiyangwuk.

KIPMANA NIMBA NAMBUO LIGA VAK KAT VILAA WAN VAKAPMA VATNA WAA WANA WANGWEYA

¹⁸ Kita nyan ndi avla woseka walandi. Ngwula kita nyan kipmana nambuo liga vat aywaa viga ligowun waa wandeya nima vat ana ndi. Wan kipmana nambuo liga vak kat kwagalalaa Godna nambuo liga vat klandeyan wan apma vatna. ¹⁹ Wan kipmana nambuo liga vak kat vilaa god

ndi kat tungwengwan yiga ligandi waa waligandi. Tamba la nyan Job God waa nyaangit piliwutndi. Kipmana nimbana nambu liga vatna aywaa woseka walinja vatna. Wan angwa vat God viga ligandi. Wupma ndi kat kwulatigandi waa tamba piliwutndi. ²⁰ Nat nyan Sam walinja nyaangipmba God waa nyaangit tamba piliwutndi. Njambwi nyabn nambu waa nyaangit tamba piliwutndi. Njambwi nyan nambu liga nimba yelavika vak kat vilaa kwo vatna waa waligandi waa tamba piliwutndi. ²¹ Ndinyangu kwutiga nda kat vilaa wana apma nda walingweya. Godna kwukna nda apma nda. Wan nda aywaa ngwutnana. Wan nda kat yelavikiyangwuk. ²² Nin Pol, Apolos, Pita ngwuk kat kwunapmak tiganin. Wan kipmamba liga nda aywaa God ngwuk kat kwiya nda. Kipmamba kwo tingweya vak God ngwuk kat apma vat tingwangat kwindi. Wundumbu yingweya vat God ngwuk kat apma ngepmamba yiga tingwangat kwindi. Mbambala liga vat ngwuk kat kwunapmak God ngwuk kat taagagiyandi. Nima sakwat nda ngwuk kat God taagandi. ²³ Ngwuk Kraistna mbaapmamba liga nimba ngwuk. Ndi Godna nyana. Nima sakwat apma vat ngwutna lak tamba yalaa ligandi.

4

GOD NDI NA NJIVWA KWUTIGA NIMBA KWUTINJA NJIVWA KAT VILAA SIGA NAGUGIYANDI

¹ Wan apma nyaangit ngwuk kat mbutiga nimbo, nino, nin kat wupma yelavik ngwula. Ndi kita vat Kraistna njivwa kwutigandi waa

yelavik ngwula. Godna pagwula la nyaangit Kraist ndi kat simogiwndi waa nin kat mbutigandi waa yelavik ngwula. ² Ngwuk nat nyan nat nimbamba njivwa kwutinda vak viga ligangwuk. Ndi wan njivwa smblan kwutnjeyan ana nglaatndi. ³ Godna njivwa kwutiwa njivwa kat vilaa siga nagungweyan ngwulai waiga vak ana wukiyowun. Nat nimba kwutiwa njivwa kat vilaa siga naguga wanjeyan ndina kwundi ana wukiyowun. Wun avla ana kwutiwa njivwa kat siga naguliyowun. ⁴ Wun kwutiwa njivwa kat ana alisiga siga nagugiyowun. Kavle maawut yelavikweyan simblan siga nagugiyowun. Njambwi nyan wunai kwutiga njivwa kat vilaa apma vat savagu siga nagugiyandi. Ndina maawut apma vat andi savagu yelavika ligandi. ⁵ Ngi kat tiga nat nimba kwutiga njivwa kat vilaa siga nguga wan njivwa kavle njsvwa wan njivwa apma njivwa waa ke waa. Ngwut kwo kawiga ali ngwula. Nima nyan yandeyamba nina njivwa aywaa vilaa siga nagugiyandi. Mbambala pagwula la vak kat aywaa simogwigiyandi. Ndinyanguna maawupmba pagwula la kavle vat aywaa simogwigiyandi. Wan yandeya njimbla apma njivwa kwutiga nyan kat apma njivwa kwutimin waa God waigandi.

NIN NAMBUO LIGA NIMBA NIN WAA NGWUK KE WAA

⁶ Wunogwi Apoloso ngwuk kat kwutiliya njivwa kat ngwuk kat nima sakwat nyaangit mbutiwun. Kwo ana mbutiwun. Wan nyaangit angwao liga nyaangitna mbutiwa ngwuk kat. Ngwuk kat simagavat mbutiwun. Nat nyana si kwusoga

walaa nat nyana si ke viyasendaga. Wan vak ngwula njivwa ana ndi. Wan vak ngwuk kat simogwivat mbutiwun. Mbutiwa nyaangit tamba la nimba piliwutndi. ⁷ Pol wuna si Apolosna si kwusoga walaa nat nsmbana si ke viyesandaga. Kanda wandi maa ndi njambwi nyana ndi kwo nyana walingwa nambu lindeya. Nin nambu liga nimba nin waa ngwuk ke waa. Ngwula nambu ngwula yelavik vapmba na kwo klangwuk. God kwindi maa klangwuk wan nambu.

⁸ Ngwuk wupma yelavitigangwuk. Nin apma vat tiganin. Nin apma nda aywaa klanin. Nin king walinja njambwi nyan yetiliga vak vla yetiliganin waa yelavitigangwuk. Wan yelavitingwa vak kavle vatna. Ngwut king tiga vla tingweyan ngwuk kat solat sigiyowun. Ngwut king tiga vla tingweyan ngwutnoginala yetigiyowun. ⁹ Wun wupma yelavitigowun. God wandi maa nin aposel nat nimbana kwupmba liga nimba nin. Nin ndinyanguna mindama sambimba vatnyavat kalinja nimba vla ligandin. Nin kat vatnyanjeya vat nat nimba vinjangat. Kipmamba liga nimba nyinangwupmba liga ensel nsmbun vinjangat nin kat vatnyagiyandi waa yelavitigowun. ¹⁰ Wun kupma yelavitigowun. Nin aposel nin Kraistna njivwa kwutiga ndina nyaangit mbutina vak kat wutaa nat nimba wutaa ngwuk tungwengwan yiga ligangwuk. Wun avla kapma vat yelavitigowun. Nin nambu liga nimba nin waa yelavitigangwuk. Wun avla kapma vat yelavitigowun. Nin aposel ava lapman tiga nimba nin waa yelavitigowun. Ngwuk avla kupma yelavitigangwuk. Nin ava liga nimba nin waa

yelavitigangwuk. Nat nimba nin aposel kat nina si kwutaa viyesandaligandi waa yelavitiganin. Ngwuk avla yelavitigangwuk. Nat nimba nina si kwusoligandi waa yelavitigangwuk. ¹¹ Tamba kan mbambala nin aposel kigin ngu lapman kiginda lapman tinin. Nina kwusoga yetina waavwi kavle yindi, ligandin. Nin kat viyaligandi. Nin ngepma ngepmamba yilaa yalaa yetiliganin. Nina angwa ngepma kai. ¹² Nima njivwa kwuka kiginda kalneya sanya klaliganin. Nin kat njika waligandi. Nin ndi kat ana njika waliganin. Ndi kat apma vat mina yeti ngwula waa waliganin. Nin kat viyandi, awat ndi kat ana viyaliganin. ¹³ Nin kat njitindi, ndi kat apma nyaangit mbutiganin. Nin aposel yagulinja kisik vla ligandin.

YELAVITWA VAK VLA YELAVIK NGWULA

¹⁴ Ngwuk kat manda kat wan nyaangit mbutiwun. Wun kai wowun wutaa wup yilangwuk walaa. Wan nyaangit wutaa ngwula maawupmba yelavika yetimbangwuk wowun. Apma vat tiganin waa waneyan ana nglaatndi waa yelavika yetimbangwuk wowun. Ngwuk wuna nyangu vla ligangwuk. Ngi kat tiga ngwutna maawut kwunapmak wowun. ¹⁵ Nima sakwat nimba tiga ngwuk kat Godna nyaangit mbupmak walingandi. Wun kita nyan ngwutna nyaek vla ligawun wun. Nat nyan kai. Wun tata yalaa ngwuk kat Kraist Jisasna nyaangit ngwuk kat mbutiwun. Ngwuk wutaa maawupmba yelavita Kraistna mbaapmamba taagawun. Ngi kat tiga wun ngwutna nyaek vla ligowun.

¹⁶ Wun ngwula nyaek vla liga ngwuk kat mbutigowun. Ngwula yelavik vak wunai yelavika liga vak vla yelavik ngwula. ¹⁷ Timoti kat ay wowun mala yilaa ngwula maawut kwunapmak yigiyandi ngwuk kat. Ndi no wuna nyan vla ligandi. Ndi kat njambwi nyanat kwutaa kiyawun. Ndi kat nimamba yelavika ligowun. Kraist Jisas waa nyaangipmba yetiwa vak ngwuk kat mbukiyandi. ¹⁸ Ngwula nat nimba kavle maawut yelavita nima kwundimba waga Pol ninai liga kava ana yaigandi. Nin kat vaatigandi waa waligandi. ¹⁹ Njambwi nyan kai walapman yindeyan samat tiga ngwulai liga kava yaigowun. Wun ngwutnai liga kava yawun mala wan kavle maawut yelavitiga nimba wun kat anagandi kwulakiyaa. Vigiyowun ndi kat. Walinja nyaangit kwo nyaangitna. Kavle nyaangitna valinja. Ndi God kwiya kwondumba ana walingandi. ²⁰ Wan apma nyaangit nina njambwi nyan Godnanamba klana nyaangit kwo nyaangit ana ndi. Wan nyaangitna angwa Godna waagan yalaa nin kat kwiya kwondu ligandi. Wan kwinda kwondu wun kwutaa ligowun. Wan kwo nyaangit waliga nimba wan kwondu ndinamba ana ligandi. ²¹ Ngwuk kat yaweya njimbla nyangu kat nyaek viyavat ya vla yalu? Yigumba ngwuk kat woviyaguga kwunaka livat yalu? Ngwutna sipana. Wun kat kai wangweyan vyaigowun. Mandit kupi maawut sika lingweyan ngwuk kat woviyaguga kwunakiyowun.

*KORINMBA TAAGWA KLALAA KAVLE YILINJA
VAT TINDI*

¹ Yambisik yilingwa vat mbuka kalilindi, wutwun. Wan yilingwa vat kavle glei vatna. Kraistna mbaapmamba la nimba ana ndi ndi kwo nimba wan vak yilingwa vak kat kai walaa ndi kwo yetiligandi. Ngwula kita nyan ndina nyaekna taakwanala ngambulindi. Wan nyan ya vak tamba wutwun. ² Tiga liga nin apma vat tiganin waa manda kat yelavitigangwuk. Wan vak kat ke yelavika. Ngwutna maawupmamba wup yiga yelavikngweyan wan apma vatna. Wan kavle vat ya nyan kat kai waa kiklingwuk, yigandi. Ngwutnogwinala kita vat ana yetigiyandi.

³ Mbambala wun ngwutnogwinala ana ligowun. Wuna maawupmamba ngwuk kat njimbla njimbla yelavitigowun. Wun kupma yelavitigowun. Wan kavle vat yila nyan kat kai awa. Ngwutnogwinala liweyan wupma waigowun. Mandit nyaangit ana waigowun. ⁴⁻⁵ Tamba yisola lingwa njimbla ngwuk kat yelavitiwun. Ngwulogwinala li vla liga yelavitiwun. Ngwuk kita yisola liga njambwi nyan Jisasna simba ligiyangwuk. Tiga wan kavle nyan kwutaa setena mbaapmamba laagagiyangwuk. Ngwutna maawupmamba ana laagagiyangwuk. Nina njambwi nyan Jisas Kraistna maawupmamba laagagiyangwuk. Seten ndina mbangi viyandi, kavle yigiyandi. Seten wupma yindeyan apma mandit maawut yelavika ligiyandi wan nyan. Tiga liga yaiga njimbla apma maawut yelavika kwo ligiyandi. ⁶ Nin apma nimba nin waa ke waa. Kavle vat ngwutnogwinala ligandi.

Bret-nao kat walinja vat ngwutnogwinala liga vat kita vatna. Yis samat taagandi, bret-nao aywaa wuka wokegiyandi waa waligandi. ⁷ Wan kavle vat yingwa vat yis vla ligandi. Wan kavle vat yingwa vat yis vla ligandi. Wan kavle vat ngwutnogwinala lindeyan ngwuk aywaa kavle yigiyangwuk. Ngi kat tiga wan kavle vat aywaa yaagilaa apma vat mina yiga yeti ngwula. Wan kavle vat yaagingweyan yis taaga lapman yinja apma bret-nao vla ligiyangwuk. God ngwuk kat wupma lingwangat wandi. Tat nina njambwi nyan Kraist ndi kat vatnyandi. Tamba Godna kimbut maawut kwunapmak Juda vatnyanja lumwin tapman sip sip vla lindi. Ndi God kwiya sip sip. Ngwutna kavle maawut kwunatndi maa apma vat mina lingwangat God wandi. ⁸ Ngi kat tiga Kraist nin kat tiga kiya vak kat yelavika yetigiyandin. Tambana kavle vak kat yelavika ana yetigiyandin. Kraistnonala kavle vat ana lindi. Ndi kat mina yelavika apma vat mina yiga yetigiyandin.

⁹ Tak ngwuk kat piliwutaa kwiwa pas ngwuk kat wowun. Yambisik yiliga nimbonala ke yetingwa. ¹⁰ Wundi nimba Kraistna mbaapmamba liga nimba ana ndi. Ndi kat kwagala ngwula waa tamba wawa nyaangipmba ana wowun. Nin tamba viga liganin. Wan nimba Kraistna mbaapmamba liga nimba ana ndi. Ndinai yetiliga vak viga liganin. Yambisik yiga yetiliga nimba ndi. Kipmana nda klavak kat mina yelavitigandi. God waa nyaangik kat kai waligandi. Ndi kat ke kwagalangweya. Tamba wan kipma yetingwa njimbla ndi kat kwagalalaa ngwutna kapma ana ligiyangwuk. ¹¹ Tamba

wan pas piliwukwa njimbla Kraistna mbaapmamba liga kavle vat ya nimba kat wowun. Kita nyan wun Kraistna mbaapmamba ligowun walaa yambisik yiga yetiliga. Kipmana nda klavak kat mina yelavika, waagan kat kwunapmak mina yelavika, nat nimba kat njika waga waleavat mina yetiligan nima ngu kilaa tungwengwan yiga, God waa nyaangik kat wutapman kai wandeyan ana nglaatndi. Wan nyan kat kai waa kwagala ngwula. Ndinogwinala kita vat ke nao kiga liga. ¹²⁻¹³ Kraistna mbaapmamba liga nimba yetilinja vak mina viga siga nagugiyowun. Ndina mbaapmamba la nimba ana ndi nat nimba yetilinja vak vilaa ana siga nagugiyowun. Wuna njivwa ana ndi. Wan Godna njivwa. Ngwutno kita mbaapmamba yetiga nimba kat viga siga ngugiyangwuk. Tamba God waa nyaangit kupma piliwutndi. Ngwulogwinala kita mbaapmamba liga kavle vat yiga yetiliga nyan kat villaa kai waa kikli ngwula waa tamba piliwutndi.

6

NIN KRISTEN NINA KITA MBAAPMA NIMBA KAT ANA KOTGIYANIN

¹ Ngwutna kita nyan ndina kita mbaapmamba liga nyan kat kimbuk yiga liga ndi kat kwutaa kotmak kalingeyan ana nglaatndi. Godna mbaapmamba la nyan ana ndi kwo nyan kimbuk yiga limbeya vak kat siga nagundeyan ana nglaatndi. Ngwuk Godna nimba ngwutna lak avla siga nagu ngwula. Apma vala. ² Ngini Godna mbaapmamba liga nimba nat kimpmamba liga nimba kwutiga njivwa kat siga nagugiyandi. Ngwut ana yelavika

ligangwuk? Ngini nima nima vat siga naguaiyangwuk. Ngini kat tiga mbambala kimbut yiga lingwa mat vak kat tiga siga nagugiyangwuk. ³ Ngini en-sel kwutiga njivwa kat tiga nagugiyangwuk. Ngwuk ana yelavika ligangwuk? Wan siga nagungweya vat nima vatna. Wan kipmamba liga siga nagulingwa vat nima vat ana ndi. Samatnat. Ngini kat tiga avla siga nagu ngwula. ⁴ Ngwutna kita mbaapma nyan kat kimbut yiga lingweyan ndi kat kwutaa kotmat ke kaliga. Wan kavle vatna. kalingwuk maa Godna mbaapmamba liga nyan ana ndi kwo nyana siga nagundeyan ana nglaatndi. ⁵ Wan vak yilingwa vat kavle vatna. Ngwula mbaapmana liga nimba nambu liga simba siga naguliga nimba tigandi? Kai? ⁶ Wan wawa apma vapmba ana yetiligangwuk. Kavle vapmba yetiligangwuk. Ngwut nat nimba kat kotmak kat kaliligangwuk. Godna mbaapmamba liga nyan ana ndi kwo nyan siga naguligandi.

⁷ Awat sowat kotmak kat kalingwa vak vilaa yelavitigowun. Godna vapmba ana yetiligandi waa yelavitigowun. Gwula kita mbaapma nyan ngwuk kat kavle vat yindeyan ndina mala. Nimamba ke yelavika. Gwula kita mbaapma nyan ngwutna nda sikwutndeyan ndina mala. Nimamba ke yelavika. Yinda vak kat yelavitapman tiga kotmak kat kalilapman yingweyan apma vala. ⁸ Wan apma vat ana yetiligangwuk. Ngwuk kapma kavle vat yiga yetiligangwuk. Awat sowat kavle vat yiga yetiligangwuk. Awat sowat sikwutigangwuk. Ngwula kita mbaapma nimba kat kavle vat yiga yetiligangwuk.

⁹ Ngwuk ana yelavitigangwuk? Wundi kavle vat yiga yetiliganimba God viga liga kava ana wuleigiyandi. Ndino klaigandi waa ke yelavika. Ana klaigandi. Yambisik yiga kavle savle yetiligan nimba, waagan kaik kat kwunatiga nimba, nat nimbana taagwa kat yambisik yiliga nimba ¹⁰ sikwutiga nimba, kipmana nda mina klavat yelavitiga nimba, nima kipmana nda mina klavat yelavitiga nimba, nima sakwat nima ngu kilaa tungwengwan yiliga nimba, nat nimba kat njitiga nimba lo kat kai walaa simblan yetiligan nimba, wan kavle vapmba yetiliga nimba aywaa God viga liga kava ana wuleigiyandi. ¹¹ Ngwula nat nimba tat wupma lindi. mbambala kavle vat yetingwa nina njambwi nyan Jisas Kraistno Godna waagano tamba silimbwimbit. Ngwuk kat kwunatimbit maa God ngwuk kat vilaa ngwuk wuna nyangu vat yetigiyangwuk waa waligandi.

GODNA SI KATSOVAT YETINGWULA

¹² Ngwula kita nyan kupma waigandi. Wun yelavikwa vapmba tigiyouwun. Njambiya kai waa waigandi. Ngiyambak wandi. Wan nyaangitna kita vat ana nglaatindi. Nat vat yelavika yetilina vak nin kat kavle vak yiligandi. Wuno wupma waligowun. Yelavikwa vapmba tigiyouwun. Njambiya kai waa waligowun. Nat vak yetiwa vak wuna maawupmba ngwandindi maa kavle vat yiga yetiligowun. Wungi vak vak yetivak kat kai waligowun. ¹³ Ngwula nat nyan kupma wigandi. God kwanda kwanda kiginda aywaa kwutndi nin kat kinangat. God nin kat yaat tigimbi kwindi kiginda kinangat waa waigandi.

Ngiyambak wandi. Wan nyaangitna kita vat ana nglaatindi. Nina yaat tigimbi kwanda kwanda kiginda nima njimbla ana tiligandi. Ngini God wandi maa ngiligiyandi. Ndu nyana mbangi wungi vat. yambikik yiga yetinangat ana God nina mbangi kwutndi. ndina njivwa kwutnangat God nina mbangi kwutndi. Mbangimba liga God waa kwundimba yetigiyandin. ¹⁴ God wandi maa nin njambwi nyan kiyalaa laatndi. God kwondu namwiya nyana. Ngini God wandi maa nina mbangi kiyalaa laakiyandi.

¹⁵ Kita vat vingwangat wowun. Ngwutna mbangi Kraistna nda. Yambisik yiliga taagwon-ala ngambungweyan ana nglaatndi. Wan vak ngambungweyan Kraistna nda yambisik yiliga taakwa kat kwiligangwuk. Ana nglaatndi. ¹⁶ Kita nyan yambisik yiligat taakwonala ngambudeyan mbik kita mbangi vla ligambit. Tamba God waa nyaangit piliwutndi. Vililik pali ngambumbeyan kitga mbangi vla ligambit waa tamba piliwutndi. ¹⁷ Kita nyan avla ndina mbangi njambwi nyanat kwindeyan wan nyan njambwi nyanonala kita vat tigiyan. Kita maawupmba yetigiyambit. ¹⁸ Yambisik yiga ke yetiga. Nat kavle vat yilinja vak mbangi kat ana kavle yiligandi. Wan kavle vat wawa vat mbangi kat kavle yiligandi. ¹⁹ Ngwula mbangi Godna waagana tiliga ngaya. Wupma ana yelavika ligangwuk? God ngwuk kat ndina waagan kwindi mala ngwula mbangimba tiligandi. Ngwutna yelavik vapmba ana yetigiyangwuk. Ngwutna mbangi Godna nda. Ndinai waigaa vapmba yetigiyangwuk. ²⁰ God ngwuk kat klavak nima wenga kwindi. Ngikat tiga ndina si katsovak

yeti ngwula.

7

TAAGWA KLALINJA VAK KAT POL KAT WAGALANDI

¹ Wun kat kwingwa pasmba nima sakwat wagalangwa nyaangit tindi, viwun. Ngwuk kat awat wangwa nyaangik kat pas piliwuta kwinga tigowun. Ndu taagwa kalalapman tindeyan apmna vatna. ² Ngwula ngepmamba yambisik yiga yetiliga nimba nima sakwat tigandi. Ngi kat tiga ngwut taagwa kita kita klangweyan apma vatna. Ngwutna taagwa ndu kita kita klanjeyan apma vatna. Wupma yiga yetingweyan apma vat yetigiyangwuk. Ngwula ngepma nimba yetila vak vla ana yetigiyangwuk. ³ Nduna mbangi taagwana nda. Taagana mbangi nduna nda. Ndu taagwa kat wandeyan lila mbangi kat ana kai waigali. Taagwa ndu kat waleyan mdina mbangi kat ana kai waigandi. ⁴ Taagwa lila mbangi kat avla ana viga ligali. Lila lan viga liga. Ndu ndina mbangi kat avla ana viga ligandi. Ndina taagwat viga liga. ⁵ Ndu taagwa awat sowat ana kai walaa kwuk ngilaa ligiyambit. Mbila mbangi waigaa vak kat kai walaa God kat wagalavat timbeyan wovuna. God kat ngambusimblalaa nat njambi mbila mbangi waiga vak kat ana kai waigambit. Njimbla njimbla mbila mbangi waigaa vak kat kai wambeyan Seten mbik kat wandi maa kavle vat yigiyandi. ⁶ An nyaangit ngwuk kat wawan njambiya ana taagawa. wagalangwa vak kat yelavika liwa vat awat ngwuk kat mbukowun. ⁷ Wunai taagwa lapman tiga vak vla tingwangat ngwuk kat

wowun. Nima sakwat nimba wunai liga vla ana ligandi. God ndi kat kapma kapma yetineya vat ndi kat kwindi.

⁸ Mbambala ndu klalapman yetigat taagwa kat wowun. Taagwa klalapman yetiga ndu kat wowun. Ndu kiyandi kwo yetikat taagwa kat wowun. Yetiwa vak vla kapma yetingweya vak wovuna. ⁹ Ngwula mbangi waliga vak kat kai walapman yingweyan ndu taagwa klaigangwuk. Wan apma vatna. Ngwula mbangi waliga vak ngwuk kat kwulatndeyan kavle vatna.

¹⁰ Ndu taagwa klaa nimba kat wun nyaangitno ligowun. Wuna nyaangit ana ndi. Njambwi nyan waa nyaangitna. Ndu klaa ligiyaa taagwa lila lan kat ana kwagalagiyali. ¹¹ Lila lan kat kai walaa kapma yetileyan wovuna. Kai walaa liga lungwamataa ndu kat yivat tileyan wovuna. Ndu ndina taagwa kat ana kai waa kwagalagiyandi. ¹² Nat nimba kat wun nyaangitno ligowun. Njambwi nyan waa nyaangit ana ndi. Wun wuna nyaangitna. Kraistna mbaapmamba la nyan ndina taagwa Kraistna mbaapmamba la taagwa ana li. Wat taagwa ndi kat kai walapman yileyan li kat ana kwagalagiyandi. ¹³ Taagwa kita Kraistna mbaapmamba la taagwat. Lila lan Kraistna mbaapmamba la nyan ana ndi. Li kat kai walapman yindeyan ndi kat ana kwagalagiyali. ¹⁴ Wat taagwa Kraistna mbaapmamba la taagwat. Lila lan Kraistna mbaapmamba ana yetindi. Lilai yeta apma vat lila lan kat kwulakiyandi. Nat ndu Kraistna mbaapmamba la ndua. ndina taagwa Kraistna mbaapmamba ana yetili. Ndinai yeta apma vat ndina taagwa kat kwulatndi. Wan apma

vat kwulatapman yeindeyan mbila mat nyangu kavle vat tigiyan di. Ana kavle vat yiga yetiligandi viga liganin ndi kat. ¹⁵ Kita nyan Kraistna mbaapmamba la nyan ana ndi. Ndina taagwa Kraistna mbaapmamba la nyan nat nyan kat wun kat ke kwagalaga waa ana waigandi. God mbik kat kai wandi siva siva walea limbangat. Apma maawutno limbangat mbik kat wandi. ¹⁶ Nyin, Kraistna mbaapmamba la taagwa, nyina lana kavle maawuk kat nyin anaganyin kwunakiyaa. Min, Kraistna mbaapmamba la ndu, mina taagwana kavle maawuk kat min anagam in kwunakiyaa. Ngwuk ana viga ligangwuk.

YETINGWA VAK KE KWAGALAGA

¹⁷ God ngwuk kat yagwa wandi maa ndina mbaapma wuleingwa vak kat yelavita a yetingwa vak ke kwagalaga. Yetingwa vak kwagalalaa mandit vat ke yiga. Tak yetingwa vat njambwi nyan waa vatna. Wupma ngepma ngepmamba liga nimba kat Kraistna mbaapma nimba kat mbutigowun. ¹⁸ Mbangi pitnja nyan God ndi kat yagwa wandi maa ndina mbaapma wuleindeyan wovuna. Wupma lindi maa ndina mbangina lumwin silimbwivak kat ana yelavikiyandi. Mbangi pitapman yinjan nyan God ndi kat yagwa wandi maa ndina mbaapma wuleindeyan wovuna. Wupma lindi maa ndina mbangi pipmak kat ana yelavikiyandi. ¹⁹ Mbangi pitapman yilinja vat, mbangi pitinja vat nima vak ana mbit. nima vat kingiyan. God waa nyaangit wuka ndinai waigaa vapmba yetineyan wan apma vatna, nima vatna. ²⁰ Kita nyan kwutinda njivwamba

lindi maa God ndi kat yagwa wandi maa wan nyan kwutinda njivwa kat ana kwagalagiyandi. ²¹ Nima njivwa min kat ngilaa lindi maa tima njimbla God min kat yagwa wandi maa yameyan wan njivwa ana kwagalagiyamin. Min kat ngilaa la nyan min kat kwagalavat wandeyan yigiyamin. Ndi kat kwagalalaa kwo ali. ²² Nima njivwa min kat ngilaa lindi maa tima njimbla God min kat yagwa wandeyan tima vak kat nimamba ke yelavika. Yagwa wandi maa wan kavle vat ana min kat ngilaa ligiyandi. Wungi kat tiga solat siligiyamin. Kwo lima njimbla God min kat yagwa wandeyan wun kwo ligowun njivwa kai waa ke waa. Kraistna njivwamba min kat ngivat yagwa wandi. ²³ Ngwuk kat klavat God nima wenga kwindi. Ngi kat tiga God waiga vapmba yetigiyangwuk. Ndu nyangu waiga kwundi Godna kwundi kat ana kwulatigandi. ²⁴ Kita mbaapma nimba, God ngwuk kat yagwa wanda njimbla yetingwa vat ke kwagalangwa. Tat yetingwa vat kwuka ndina mbaapmamba yetigiyangwuk.

KWANDI NDU KWANDI LAAGWA KAT WANDA NYANGFI

²⁵ Wun kat wagalangwa vak kat awat ngwuk kat mbukiyowun. Kwandi ndu kwandi lagwa kat mbukiyowun. Wan mbutiwa nyaangit God wandi, ana ngwuk kat mbutigowun. Wuna maawupmba yelavita mbutigowun. Tak God wun kat apma vat yiga nima njivwa kwindi maa kwutigowun. Ngi kat tiga wuna maawupmba yelavitiwa vak ngwuk kat mbukwun mala wukiyangwuk. ²⁶ Kan mbambala tina njimbla nima sakwat vat tigandi.

Ngi kat tiga yetingwa vak kwagalalaa nat vat ke yiga. ²⁷ Taagwa klalaa wat taagwa kat kai walaa nat vat ke yiga yetiga. Taagwa lapman timeyan taagwa ke klaa. ²⁸ Taagwa klameyan kavle vat ana ndi. Ndu lapman ta kwo ndu klaleyan kavle vat ana ndi. Ndu taagwa kla nimba nima sakwat vat ndinamba ligiyandi. Ngwuk kat nima sakwat kavle vat klavak kat kai wowun.

²⁹ Wuna kita mbaapma nimba, kupma waligowun. Kan kipmamba yetineya njimbla sivla kai. Kan yetina njimbla taagwa klaa nyan ke taagwa kat mina nimamba yelavika yetiga. Taagwa klalapman nyan yelavika yelavika yetiga vapmba yetigiya njambwi nyana njivwa mina kwukiyandi. ³⁰ Nglaa liga nimba nimamba ke nglangwa. Solat asi ngwula. Wan nglalingwa kavle vat ngiligiyandi. Kaseliga nimba nimamba ke kaselingwa. Kaselingwa vak ngiligiyandi. Kwanda kwanda nda klaa nimba ke kwutaa lingwa. Klangwa nda ngiligiyandi. ³¹ Kipmamba njivwa kwutiga nimba ngwuk kwutigngwa njivwa kat mina nimamba ke yelavikngwa. Kan yetina kipma nima sakwat njimbla ana ligiyandi. Ngi kat tiga njambwi nyana njivwa nimamba kwukiyanin.

³² Ngwuk kat nima sakwat vat yiga yetivak kat kai wowun. Taagwa klalapman nyan njambwi nyana njivwa kat mina yelavika yetiligandi. Ndi njambwi nyana nyaangit mina wuka yetigiiyandi. ³³ Taagwa klaa nyan wan kipmana nda kat yelavika ligandi. ndina taagwa waa nyaangit wuka yetigiyandi. ³⁴ Ndi vililik vak kat yelavika yetiligandi. Ndu klalapman yetiga taagwa

njambwi nyana njivwa mina kwuka yetiligali. Lila maawut lila mbingi njambwi nyana njivwa mina kwutigali. Ndu klaliga taagwa kipman vak kat yelavika ligali. Lila lan waiga kwundi wuka ligiyali. ³⁵ Wan wawa nyaangit ngwuk kat kwunapmak kat mbutigowun. Ngwuk kat njambiya taagavak kat kai wowun. Apma vat savagu liga vat mina kwuka yetingwangat wowun.

³⁶ Kwandi nyan kat taagwa kat klavat wandeyn klaigandi. Ndina mbingi kwulatndeyan klaigandi. Ndina maawut tigiya vapmba kita vat tigiya mbat. Kavle vat ana ndi. ³⁷ Kwandi nyan kita yelavika yetindeya vapmba taagwa klavak kat kai wandeyan apma vatna. Nat nyana nyaangipmba ana yindi. Ndina maawupmba yelavika lindi. Ndina mbingi waiga vak kat kwulatndeyan taagwa ana klaigandi. ³⁸ Kita nyan ndi kat kwusisivanja taagwa klandeyan apma vatna. Kita nyan ndi kat kwusisivanja taagwa klalapman yindeyan apma nglei vatna. ³⁹ Ndu klaiga taagwa lila lan kat kwagalalaa ana yigiyali. Kiyandi maa nat ndu yiga klaigali. Kraisna maapmamba la nyan ana ndi nat nyan kat ana klaigali. ⁴⁰ Yelavika liwa vat kingiyan. Ndu kiyandi yetigiya taagwa kwo yetileyan apma vatna. Wan wawa nyaangit wuna maawupmba yelavita wowun ngwuk kat. Godna waagan wuna maawupmba tiligandi.

8

WAAGAN KWINJA MBATNA NYAANGIT

¹ Mbambala ngwuk kat waagan kat kwinja mbatna nyaangit wun kat wagalangwa nyaangit

awat ngwuk kat mbupmat yigowun. Wan waagan kat kwinja vak kat tamba yelavika liganin waa wun kat piliwukngwuk. Wuno yelavika ligowun. Lamba wuka liganin waa yelavika yetineyan nat nimba kat kai waiganin. Nat nimba kat yelavika woviyaguga lineyan ndi kat kwunakiyanin. Wan apma vatna. ² Kita nyan wun tamba aywaa wuka ligowun waa wandeyan wan wuka yelavika linda vat ndina maawut kavle vatna. Ndi aywaa ana wuka ligandi. ³ Kita nyan God kat woviyaguga lindeyan ndi wuka yelavika linda vat ndina maawut apma maawut tindi, God viga ligandi. ⁴ Waagan kaik kat kwinja mbak kilinja vak kat ngwuk kat ngambuvat yigowun. Waagan kait kwonduo liga nda ana ndi waa viliganin. Waagan kait kwonduo liga nda ana ndi waa viliganin. God kita ligandi waa viliganin. ⁵ Kipamamba liga nima nimba anagandi. E? Nyinangwupmba liga njambwi nimba anagandi. ⁶ Wundi nimba kat nin ana yelavika liganin. Nin nina nima nyan kita ligandi. God. Ndi nina nyaekna. Ndi aywaa kwanda kwanda kwuka ndinyangu nin kat kwutndi. Ndi kat mina yelavika yetiliganin. Nina njambwi nyan kita. Jisas Kraist. God wandi maa kwanda kwanda aywaa kwutndi. Nin kat kwunatndi, nin kwo liganin.

⁷ Nima sakwat nimba wan nda kat ana viga ligandi. Nat nimba tat waagan kaik kat kwunaka yetilindi. Waagan kat kwinja mbak kat waagana kigiyaa waa yelavitigandi. Kinayan nin nlambio ligiyanin waa yelavitigandi. Kinjeyan ndina maawut kavle yigiyandi. ⁸ Kineya kinginda nin kat kwutaa God tiga kavat ana kaligiyandi.

Kineyan nin kat God ana kai waigandi. kilapman yeineyan God nin kat vilaa apma vat yimin waa ana waigandi. ⁹ Ngwuk viga ligiyangwuk. Wan kiginda nyaangitno ana ligandi. Kimeya vak kat nat nyan vilaa ndina maawut kavle yindeya vak ana nglaatndi.

¹⁰ Ngwuk wan vak kavle ana ndi waa ngwut viga ligangwuk. Kat nimba wan vak kavle vatna waa yelavitiga nimba waagan kaitna ngay wuleilaa kingweya vak vilaa yelavikiyandi. Ndi kavle vat yiligandi. Nino wupma anaganin yigiyaa waa yelavikiyandi. ¹¹ Kingweya vak vilaa ndino kinjeyan ndina maawuk kavle yigiyandi. Kraist ndi kat kwutaa kalivat wundumbu yindi. Ngwuk manda kat wupma yiga kiginda kiga ndi kat kumbang sagugiyangwuk. ¹² Ngwuk wupma yingwan Kraist kat kavle vatna yilingwa. Ngwula kita mbaapma nimba kat kavle vatna yilingwa. Yingwuk mala ndina maawut kavle yindi. ¹³ Kiwa vak kat vilaa wuna kita mbaapmamba liga nimba kavle vat yinjeyan wan vak kai waa kwagalgiyowun. Kavle vat yinjangat kai wowun.

9

POL KAT VIGA NDI KAT NAO KIGINDA ANA KWILINDI

¹ Kita ngepma nimba yetiga vatna aitamba ana ligowun. Wun aposel wun. Nina njambwi nyan Jisas kat wuna minimba viwun. Wun njambwi nyana njivwa kwutiwun, tamba wukngwuk. Wutaa njambwi nyana kwupmba yangwuk. ² Nat nimba wun kat wandi. Pol aposel ana ndi wandi. Ngwuk wupma ana waigangwuk. Njambwi

nyana nyaangit wutaa njambwi nyana kwupmba yetingwa vak vilaa Pol aposela waigandi.

³ Nat nimba wun kat njitnjeyan wun kupma waigowun. ⁴ God waa nyaangit mbutina nimba, nin ndinamba nao kiginda klavat waneyan wovuna. Ndi kat kwutina njivwa kat tiga kwigiyandi. Ana ndi kat nao kiginda kwintang waliganin. ⁵ Wun nat aposel kwuta vapmba kwukweyan wovuna. Nat aposel, njambwi nyana yakwa nimba, Pita, ndi Kraistna mbaapma la taagwa klalaa wundi taagwa ndinogwinala yindi. Taagwa klalaa kalinja vapmba ana kaliligowun. ⁶ Wunogwi Banabaso njiva kwuka sanya klalaa nao kiginda kat wenga kwiga kiliga. Nat aposel kai. Nat aposel kwutnja vak vla kwutileyen wovuna. ⁷ Yetiliya vak soldia yetiliga vak vla ana yetiligali. Ndi soldia kiginda avla ana klaligandi. Nat nimbandi ndi kat kigivat kwiliga. Ambukat kwutiga nyan ndina ambugapmba wotiga kandi nda sigika pika kiligandi. Bulmakau kat viga liga nyan ndino nimbun viga linda bulmakauna mwunya mbi kumitaa kiligandi. An wungi vak ana yetiligali. ⁸ Kan vak kipmamba liga nimba mina liga vat ana ndi. Tamba God wandi, piliwutnja nyaangit kia vatna. ⁹ Moses kwiya vapmba kupma viliganin. Palingwenga yuwi sik pangwupmak veinginya liga bulmakau ndina tipwi ke sangiga. Kigandi waa piliwutndi Moses. God wan nyaangit manda kat kwindi. Bulmakau kat mina miwa yilaa kwindi? E? Kailuwa. ¹⁰ Ndino ndinyangu kat miwa yilaa kwindi. Ambugat kwutiga nyangu kiginda pitiga nyangu kigiyandi. Ngini kigiyenin waa yelavitaa

ndi njivwa kwutigandi.

¹¹ Godna nyaangit ngwuk kat simogwilinan kipmamba mi sik klalaa kandi tuliga nyan vla liganin. Ngwutnamba kwanda kwanda nda klaneyan apma vatna. nglaaatndi.

¹² Nina kwupmba ngwuk kat ya nimba kwanda kwanda nda ngwutnamba klaligandi. Nin tat ya nimba wan nda kalaneyan nglaaatndi. Nin wupma yivak kat kai wanin. Nin kupma yelavitigansn. Ndinamba kwanda kwanda nda kat wagalaneyan wan mbutina Kraistna apma nyaangit anagandi wupmak kat kai waiga waa yelavitiganin. ¹³ Juda kwutinja Godna ngaymba njivwa kwutiga nimba Godna ngaymba kaliga taaganja nao kiginda ndi kiligandi. God kat wimbu kwiliga nimba nat samat kiliandi. God kat wimbu kwiliga nimba nat samat kiligandi. Ngwuk viga ligangwuk wan nda kat. ¹⁴ Nin wan apma nyaangit mbutiga nimba nin kat njambwi nyan wandi. mbutingwa nimba ndinamba nao kiginda klaigangwuk waa wandi njambwi nyan.

¹⁵ Wun wupma yivak kat kai wowun. Ngwuk kat kwanda kwanda nda kat wagalavak kat pas ana wupma piliwukwun. Wun kiginda lapman tiga kiyaweyan wovuna. Ngwuk kat kiginda kat ana waigowun. Ngwutnamba kiginda klaweyan ana klaligowun waweya nyaangit kwo vatnat tigiyanidi. ¹⁶ Wun apma nyan wun waa ana waigowun. Apma nyan tiga kan nyaangit wunayi mbutiga waa ana waigowun. Wuna maawupmba ana mbutigowun. Njsamwi nyan ambuk wandi maa mbutigowun. Kai wowun ana mbukiyowun waweyan kavle vatna. ¹⁷ Kan

kwutiwa njivwa wuna maawupmba kwukweyan awat sanya ndinamba klaigowun. Wan njivwa wuna maawupmba ana kwutigowun. Njambwi nyan waiga vapmba kwutigowun. ¹⁸ Wan wenga klaligowun. Maawupmba yelavika solat siweya vat wuna apma wenga vla ligandi. Kipmana wenga klalapman wan apma nyaangit mbutiwangat solat siligowun. Nat aposel kla vak vla wenga klavak kat kai wawangat solat siligowun.

POL NAT NIMBA YETA VAPMBA YIGA YETILIGANDI

¹⁹ Kita ngepma nimba yetiga vatna aitamba ana ligowun. Ndina ngepma vat wun kat ana kwutaa ligandi. Wun avla woviyagulaa ngepma ngepmana vak kat yi ya yetiligowun. Ngepma ngepmamba liga nimba kat kwutaa Kraistna mbaapmamba taagavat ndina kwupmba yetiligowun. ²⁰ Juda la kavamba liwan Judana ngepma vapmba yetiwun. Ndina nima sakwat nimba kat kwutaa Kraistna mbaapmamba laagavat ndina kwupmba yetiwun. Moses kwiya vat wun kat ana kwutaa ligandi. Tamba Judonala tiwan wuna maawupmba Moses kwiya vapmba yetiwun. ²¹ Juda ana ndi nat nimbana ngepmamba liwan ndina ngepmana vapmba yetiwun. Moses kwiya vapmba ana yetiligandi. Ndi kat kwutaa Kraistna mbaapmamba taagavat ndina kwupmba yetiwun. God waa nyaangik kat kai walaa ana yetiwun. Kraist kwiya vapmba yetiligowun. ²² Tamba Kraistna mbaapmamba la nimba, nima sakwat njambiya taagaliga nimba, ndina ngepmana liwan taagalinja

yetiwan. Wun nima sakwat kapma kapma vapmba yetiliga nimbonala yetiliwan. Ndi kat kwutaa Kraistna mbaapmamba taagavat ndina kwupmba yetiwan. ²³ Nima sakwat nimba Godna apma nyaangit wutndi, God ndi kat apma vat yindangat ndina kwupmba yetiliwan. Kingi vapmba yetiwan God wuno wun kat apma vat yigiyandi.

NIMAMBA NJIWA KWUTINEYAN APMA NIMA WENGA KLAIGANIN

²⁴ Ngwuk yelavik ngwula kwulak kwulapmba yetiga nimba kat. Ndi aywaa piliga yiligandi. Kita nyan mina nat nimba kat kwulataa apma nima wenga klaligandi. Ngwulo ngwuk kat Godna njivwa nimambakwutingwuk mala ngwuk kat apma wenga kwigiyandi. Ngi kat tiga nimamba njivwa agwut. ²⁵ Kita nyan spotna vat kwulapmak wandeyan nat vat kwagalalaa nima njivwa kwuka yetigiyandi. Ngini ngiligiyaa nima wenga nda klavat wan nima njivwa kwuka yetigiyandi. Nin njimbla ligiyaa nima wenga nda klavat Godna njivwa nimamba kwutiganin. ²⁶ Wun kwulak kwulak yetiga kita nyan vla Godna njivwa kwutigowun. An ngangit ana yeligowun. Ava yambi savagu yiligowun. Wun waleaga taambamba viyaliga nyan vla Godna njivwa kwutigowun. Wun taamba simblan ana yaagiligowun. ²⁷ Spotna njivwa kwutiga nyangu tagula avo limbanin walaa kwutigandi. Nina mbangit vali yindi mala nina mbangit vali yigiyaa vak kat ana wukiyanin waa yelavitigandi. Wun wuno Godna njivwa kwuka wuna mbangit waiga

vak kat ana wuka ligiywowun. Nat nimba kat tamba wowun. Godna njivwa nimamba agwut wowun. Wuna mbangi waiga vat wutaa Godna njivwa kwutapman yiweyan ana nglaatndi.

10

TAMBA LA NIMBA KAVLE YINJA VAK KAT YELAVIK NGWULA

¹ Yakwa nimba kita vat vingwangat wowun. Tamba Moses ta njimbla timbu yinja yambi ndi kat visimogwindi. Nina ngwat walanga aywaa timbu vigivaa yilindi. ² Ndi aywaa Mosesna kwundi wuka timbuna kwupmba yilindi. Moses wandi maa sak ngu mbilindi maa kipma valigenja njimbla ndi aywaa valigendi. ³ God ndi kat nyinangwutna nao kwindi, ndi aywaa kindi. ⁴ Moses kambat viyandi, mbilindi, wogweya ngu ndi aywaa kindi. Ndinogwinala yila nyan kambak vla lindi. Ndi Kraistna. Ndi kat viga lindi. ⁵ Ndi aywaa apma vat ana yindi. Ndina nima sakwat nimba God waa nyaangit wupmak kat kai wandi maa God ndi kat kai walaa kiklindi. Ndi ndinyangu lapman kavamba yiga liga kiyandi.

⁶ Ndi kavle nda klavak yelavika liga kavle yindi. Nin mbambala kavle yinja vak kat vilaa yelavikiyanin. Kavle nda klavak yelavika lineyan nino kavle yigiyanin waa yelavikiyanin. ⁷ Ndina nat nimba waagan kait kat kwunaka lindi. Tamba la nimba yinja vak vilaa piliwutndi. Ndi nao ngu kilaa waagan kait kat kwunapmak mbangu veivat laatndi. Yinja vla mbaa yilanin. ⁸ Ndina nat nimba yambisik yilinja vak yilindi maa God ndi kat sindi. Siga 23,000 nimba kat sindi, kiyandi kita

nandinyamba. Yinja vla mbaa yilanin. ⁹ Ndina nat nimba God kat wandi. Nin apma vat nin kat ana viga ligamin. Min kwonduo liga nyan o kai? waa wandi. Wandi maa God wandi maa kavle kamboy yalaa ndi kat valindi, nima sakwat nimba kiyandi. Yinja vla mbaa yilanin. ¹⁰ Ndina nat nimba God kat njitindi, njambwi nyan ndi kat vatnyandi. Yinja vla mbaa yilanin.

¹¹ Ndi kat kavle vat ya vak ndi kat mandip kupi maawut kwivat yandi. Nat nimba yilaa piliwutndi. Nin ngini la liga nimba vilaaa apma maawut sitnangat walaa piliwutndi. ¹² Ngwutna kita nyan wun apma vat mina yiga yetiligowun. Wun ana kavle yigiyowun waa yelavitndeyan ana nglaatndi. Samat tiga ndi anagandi kavle yigiyaa. ¹³ Ngwuk kat yaliga kavle vat ngwuk kat mina ana yaligandi. Yandi ma nimamba ke yelavika lingwa. God ngwutna lak kwaigandi. Ngwuk kat kwulakiya kavle vat kat God kai wandi, ngwuk kat ana yaa kwulaiyandi. Ngwuk kat ava kwondu kwindi maa ngwuk wan yaiga kavle vak kat kwulakiyangwuk.

GOD KAT YELAVIKA YETIGA LIGA WAAGAN KAT ANA KWUNAKIYANIN

¹⁴ Wuna mbaapma nimba waagan kait kat kwunatinja vak ke yingwa. Wan kavle vatna. ¹⁵ Ngwula maawut tamba sika ligangwuk. Ngwuk avla yelavika siga naguga kwutaa ligiyangwuk. ¹⁶ Yetilina vak kat yelavik ngwula. Nin njimbla njimbla ngu liga kap kwutaa Kraist nin kat tiga kiyandi waa yelavika kiliganin. Kraist kiyandi maa ndina yelagwen kipmamba ndandi

nin kat kwunapmak wan yelavika kiliganin. Ngwuk bret-nao kita kwutaa samat samat limbaga kwutaa Kraist nin kat tiga kiyandi waa yelavika kiliganin. Kraist nin kat kwunapmak kiyandi waa yelavitnin mala Kraist nin kat kwunakiyandi. Nin aywaa ndina kita mbaapma nimba liganin. ¹⁷ Nin kitamba yisolaa bret-nao kita limbaga kitamba kiliganin. Ngi kat tiga nin aywaa ndina kita mbaapma nimba liganin.

¹⁸ Tamba la Juda wungivat sigit ndino tindi. God kat kwunapmak kat kwinja wimbu ka nimba ndi aywaa kita mbaapma nimba lindi. Ndi kita vat yelavika kilindi. ¹⁹⁻²⁰ Anda vapmba yelavikngwangat wan nyaangit mbutigowun. Wuna nyaangit wutaa waagan kaik kat mbaa vaatangwuk. Waagan kait kat kwinja nda kat mbaa vaatangwuk. Wan nda nima nda ana ndi. Kita nda yelavikngwangat waligowun. Wan nda kingiyandi. Nat kavle nimba waagan kaik kat yelavika waagan kat kwunaka yetinjeyan nima nyan kat ana yelavika yetigiyandi. Ndi kipma liga mat nimba kat mina yelavika kwunatigandi. Ngwuk mbaa ndina mbaapma weleilaa kita vat yelavitangwuk. ²¹ Waagan kaik kat mina kwunaka yetiga liga njambwi nyan Jisas nin kat tiga kiyandi waa yelavika yetiga liga Jisasna mbaapma nimbonala ana wan ngu kigiyangwuk. Kavle vat apma vat kapma kapma tigandi. Waagan kaik kat kwunatiga nimbogwinala kitamba ana kigiyangwuk. ²² Ngwuk wupma yingweyan njambwi nyan ngwuk kat kimbut yiga wun kat manda kat kwangalalaa waagan kat mina kwunatigangwuk waa yelavika tigiyandi.

Ndi kat ana inaka kwunalakiyanin.

SIVA SIVA GODNA SI MINA KWUSOGA LIGIYANIN

²³ Nat nimba wwaligandi. Yetineya vak njambiya kai waa waligandi. Ndinai waa vak kita vat ana nglaatndi. Nat vak yetineya vak nat nimba kat ana kwunatigandi. Nat vak yetineya vak nat nimba kat kavle vak yeligandi.

²⁴ Ngwuk ngwutna maawupmba mina ke yelavika yetingwa. Ngwutna maawupmba yetingweya vapma yetingweyan nat nimbana maawui kat mbaa kavle yilangwuk. Wan nimba kat apma vapmba yelavika yeti ngwula.

²⁵ Stuamba klanjeya wimbu kiginda kigiyangwuk. Wan nda kat yanda kava kat maawupmba ke yelavika. Wan nda kwowa, kigiyangwuk. ²⁶ Nin viliganin. Wan kipmamba tiga nda njambwi nyana nda aywaa tiga.

²⁷ Kraistnana mbaapma nyan ana ndi wuna ngaymba yaa ki ngwula waa wandi maas yingweyan wovuna. Ngwuk kat kwindeya nda wana kai wangweya. Wana ngwutna maawupmba yelavika wata wagalalingweya. Agimbangwuk.

²⁸⁻²⁹ Kita nyan waagan kat kwilinja wimbu kiginda kan ngwuk kat kwiga ngwuk Kraistna nimba wan wimbu kindiga kiligangwuk? Waa wandeyan ngwuk ke kingwa. Kingwuk mala ngwuk kat waigandi. Ngwuk kavle nimba ngwuk waa waigandi. Kavle nimba ngwuk waa ngwuk kat mbaa yelavitnadi wan nyan. ³⁰⁻³³ Nat nyan wun kat wigandi. Wan kiginda God nin kat kwidi. Ndi kat sivu kilaa kiweyan wovuna. Nat nyan kavle

vatna ke kiga waa wandeyan ndinai waigaa vak manda kat wukiyowun waa waigandi.

11

¹ Kraist yeta vla yetigowun. Ngi kat tiga wunai yeta vla yeti ngwula.

NAMBU KAPMANJEYA VAT

² Ngwuk njimbla njimbla wun kat yelavika lingwuk. Ngwuk kat mbukwa nyaangit kupma yeti ngwula waa mbukwa nyaangit kwutaa yetiligangwuk. Wungi kat tiga ngwula si kwusolaa yetiligowun. ³ Nyaangit kuvuk kwutaa yelavika yetingwangat wowun. Kipma liga ndu aywaa ndina njambwi nyan Kraist. Taagwana njambwi ndua. Kraistna njambwi Godna. ⁴ Kita ndu ndina nambu kapmalaa God kat wagalandeyan wan vat kavle vatna. Ndina nambu kapmalaa Godna nyaangit nat nimba kat mbutndeyan wan vat kavle vatna. Wan kavle vat yindeyan njambwi nyana si kwutaa viyesandagiyandi. ⁵ Kita lagwa lila nambu kapmalapman God kat wagalaleyan wan vat kavle vatna. Lila nambu kapmalapman kwo liga Godna nyaangit nat nimba kat mbupmat tileyan wan vat kavle vatna. Wupma yeli vilaa nat nimba waigandi. O nyin wup kai? Wupma yinya. Nyina lana kwupmba waa livak kai? Waigandi nat nimba. ⁶ Kita lagwa lila nambu kapmalapman yileyan nimbi aywaa vilaa yetilingat taagwa vla ligali. Nimbi aywaa vilaa wup yilapman yetilingat taagwa vla yetiligali waa yelavitiganin. Ngi kat tiga taagwa nambu kapmalaa yetigiyandi. ⁷ Ndu kapma vatna. Nambu ana kapmalaa God kat

waignadi. Ndu njambwi nyana. God tiga vak vla ndu kat kwutndi. God ndu kat viga linda vak vla ndu taagwa kat viga ligandi. Ngi kat tiga kwupmba liga nyan vla manda kat nambu kapmagiyandi. Taagwa nduna kwupmba ligandi. Ndu tiga vak vla God taagwa kat kwutndi, tigandi.

⁸ God taagwa kat ana tak kwutndi. Lila mbangimba ava pangwuka klalaa ana ndu kat kwutndi. God tak ndu kat kwutndi. Ndina mbangimba la ava pangwuka klalaa taagwa kat kwutndi. ⁹ God taagwa kat yelavita ana ndu kat kwutndi. God ndu kat yelavita taagwa kat kwutndi. ¹⁰ Taagwa nambu kapmalaa yetili mala vilaa waigandi. Wat taagwa lila nduna nyaangit wuka ndina kwupmba yetiligali waa waigandi. Nyinangwupmba liga ensel nimbun vilaa waigandi. Li apma vat yetiligali waa waigandi. ¹¹ Taagwa mina kapma livat ana nglaatndi. Ndu mina kapma livat ana nglaatndi. Wan vak kat njambwi nyan kai waligandi. njambwi nyan ndu lagwa kita vat tivak kat waligandi. ¹² Tamba God nduna ava klala taagwa kat kwutndi. Kan njimbla taagwa nyangu kwutigandi. Ndu lagwa kita vat yetiga nima sakwat yigiyandi waa tamba wandi God. kipmana kwanda kwanda nda ndu tagwa yetinja vak aywaa God viga ligandi.

¹³ Kita laagwa nambu kapmalapman yetiga yesolaa liga God kat waleyan apma vatna? Kavle vatna? E? Yelavik ngwula. Ngwula ngepmana vat ana ndi. ¹⁴ Ngwutna ngepmana vat kingiyandi. Ndu sivla nimbo lindeyan kavle vatna. Ndi taagwa sivla nimbo linjeyan wan vak kat woviyaguga apma vatna waligangwuk. ¹⁵ Taagwa

sivla mbundinimbo lileyana lila mbangina yelaganda vlagandi. Lila nimbi lila nambu kapmalaa ligandi. Wupma God li kat sivla nimbi kwindi. ¹⁶ Kita nyan mbutuwa nyaangik kat kai waa yelavitndeyan ndina mala. Ngini la liga nyaangit kupma ligandi. Nino ngepma ngepmamba liga Godna mbaapmamba liga nimba wan mbukwa vapmba yetiliganin.

KIGINDA KIVAK KAT JISAS NGWUK KAT WAA VPMBA ANA YETHLIGANGWUK

¹⁷ Mbambala ngwuk kat nat nyaangitg ngambuvat yigowun. Wan ngambuweya nyaangit ana ngwula si kwutaa katsogiyowun. Siva siva yisola lilingwan awat sowat ana kwunatigangwuk. Kavle vat yiligangwuk. ¹⁸ Njimbla njimbla yisola lingwan kita vapmba yelavika ana yisolaa liligangwuk. Kapma kapma mbaapmamba liga yisolaa liligangwuk. Wan yilingwa wuka ligowun. Woseka ana wandi waa yelavitigowun. ¹⁹ Kapma kapma yelavika yetingwa vat kiga yisolaa liga aywaa wan nyaangit ngambu ngwula. Ngambungweyan apma vat tiga nyaangit kwulatndi mala viga wutaa kwutaa yetigiyangwuk. ²⁰ Tak Jisas ngwuk kat kitga vak yisolaa kiginda kingwangat wanda vapmba yisolaa lingweyan kavle vapmba liga yisolaa liligangwuk. ²¹ Kita vak ana kiligangwuk. Kwo liga nyan kat viga ana kwiligangwuk. Ngwuk kapma kiligangwuk. Nat nimba wundi kat tiligandi. Nat nimba nima sakwat nima ngu kilaa tungwengwan yiga liligandi. Wan vak apma vat ana ndi. ²² Nso ngu kapma kigat walingweyan

ngwuk ngwula ngaymba yiga wuleilaa agi ngwula. Ngwulagwinala kita mbaapma liga nimba Godna mbaapma nimba ndi kat manda kat kai waligangwuk. Kwilapma yingwa vak kat vilaa kwo liga nimba wup yiga liligandi. Yilingwa vak kat wutiwan apma vat yiligandi waa ana yelavika liligowun. Kavle vat yeligandi waa yelavika liligowun.

JISAS BRET-NAO NGU NDIINA MBAAPMAMBA LA NIMBA KAT KWINDI

²³ Tak ngwuk kat mbukwa vat kingweya vat wuna maawupmba ana yelavita mbukwun. Nima nyan waa nyaangitna ngwuk kat mbuknwa. Jisas kat sinjangat Judas kamwin kwiya ngan njambwi nyan Jisas bret-nao kwutndi. ²⁴ Kwutaa God kat ngambulaa limbaga kwiga wandi. Kan wuna mbangina wimba. Wuna mbangi ngwuk kat kwunapmak kat tiga vatnyagiyandi. Vatnyanjeya vak kat yelavika agi ngwula. ²⁵ Kindi maa Jisas ngu liga kap klalaa ndi kat kwiga wandi. Kan ngu god ndinyangu kat kwiya kupi paak kat ava kwiligandi. Wun kat vatnyandi, wuna yelogwen kipmamba salatndi maa kupi paak ava liga tigiya ndi. Kingweyan njimbla wunai kiya vak kat yelavikiyangwuk waa wandi Jisas. ²⁶ Wan bret-nao kiga ngu kingweyan Jisas nin kat tiga kiyandi waa visimogwigiyangwuk nat nimba kat. Kan vak yiga yetilingwuk, ngini nima nyan lungwamataa yaigandi. Yandi maa wan kiga yetilingweya vak ngiligiyandi.

KITA NYAN KAVLE MAAWUT YELAVIKA KINDEYAN NDI KAT GOD NIMA VAT YIGIYANDI

²⁷ Kita nyan Jisas kwiya bret-nao ngu kavle savle kindeyan wan nyan ana nglaatndi. Ndi njambwi nyan kwiya mbango yelogwen kat ana savagu yelavika liligandi. Ndi nglambio liga kiligandi. Ndi njambwi nyana si kwutaa viyesandagiyandi.

²⁸ Wan bret ngu kiliga nima sakwat nimba ndina yelavimat nima nyan Jisas Kraist kiya vak kat yelavitinjeyan ndi apma vat tigiyan. Kraistna vapmba yetiligowun? E? Ana yetiligowun? Waa maawupmba wagalagiyandi.

²⁹ Jisas kiya vak kat yelavitapman bret ngu kwo kindeyan ndi kavle nyana. Njambwi nyan ndi kat kavle vat nima vat yigiyandi.

³⁰ Ngwutna nima sakwat nimba wan kavle vat yiga liga nat nimba yelogwengat tiligandi. Nat nimba kiyaligandi.

³¹ Nin yelavika yetilina vak Jisas kiya vak kat yelavitineyan God nin kat ana kavle vat nima vat yigiyandi.

³² Nin God kwukna nyangu nin. Ndina mbaapmamba liga nimba ana ndi nat nimba kavle yilinjangat God ndi kat siligandi. Nin ndina mbaapmamba liga nimba nin kat kwunapmak siligandi. Nat nimbagwinala nin kavle vat yivak kat God kai walaa nin kat kwunapmat siligandi.

³³ Kiginda kivat yisola linja njimbla ngwula kapma yelavika wana kilingweya. Nat kwo tiga nimba kat viga yelavika agwimbangwuk.

³⁴ Nima sakwat nao kiginda kigiyanin waa waliga nimba ndina ngaymba kigiyandi. Wungi kiginda kat yisolaa liga kavle vat yilangwuk. Nima nyan ngwuk kat silandi. Ngwutnai liga kava yaweyan ngwutnai kavle vat yiliga vak kat kwunakiyowun.

12

GODNA WAAGAN KWILIGA VAK

¹ Mbambala ngwuk kat Godna waagan kwiliga vak kat ngwuk kat mbupmat yigowun. Wuna mbaapmamba liga nimba kan vak kat wukwanganat mbutigowun. ² Tamba Godna mbaapma ana wuleigba lingwuk. Nyaangit ngambulapman ta waagan ngwuk kat viga lindi. Ngwuk kat kavle maawut yelavika yetingwangat kwilindi. ³ Mbambala kapma vapmba ligangwuk. Ngwuk awuk ngwula. Kita nyan Godna waagan ndina maawut ngwandindi maa Jisas kat kavle nyana waa ana waigandi. Kita nyan ndina maawupmba yelavita Jisas wuna njambwi nyana waa yelavita ana waigandi. Godna waagan ndina maawupmba ngwandindi maa wupma waigandi.

⁴ Godna waagan kita ligandi. Mandit mandit vak ndinyangu kat kwiligandi. ⁵ Nima sakwat mandit mandit njivwa nima nyan kat tiga kwutiganin. Nima nyan nima sakwat ana ndi. Ndi kita ligandi. Ndi Godna. ⁶ Nat nimba kat kwunapmak mandit mandit njivwa kwutiganin. Kwutina njivwa kat ava kwiya nyan kita ligandi. God. ⁷ Godna waagan ndina vak kita kita nyangu kat kwiligandi. Awat sowat kwunaka yetinjangat kwiligandi. Awat sowat kwunatina vak kat vilaa ndi Godna waagana vak klandi waa wagiya. ⁸ Apma maawutno liga nat nimba kat mbutdeya vat Godna waagan nat nyan kat kwiligandi. Godna vat nat nimba kat simogwindeya vak kat Godna waagan nat nyan kat kwiligandi. ⁹ Godna nyaangit wutaa maawupmba yelavika kwutaa linjea

vak Godna waagan nat nyan kat kwiligandi. Yelogwengat kwaa liga nimba kat kwunatinja vak Godna waagan nat kita nyan kat kwiligandi. ¹⁰ Kwunatinja nima njivwa kwutinja vak nat kita nyan kat Godna waagan kwiligandi. Nat nyan Godna nyaangit nat nimba kat mbutndeya vat klaligandi. Kavle waagan waliga nyaangit Godna waagan waliga nyaangit siga naguga mbutinja vak nat nyan wutaa akaligandi. Nat nimbana ngepma kwundi mbutinja vat nat kita nyan klaligandi. Nat nyan wan nyaangit wutaa ndina ngepma kwundimba mbutigandi. Godna waagan ndi kat maawut kwindi mala mbutigandi. ¹¹ Wan apma kapma njivwa aywaa Godna waagana kwiliga. Ndi kita nyana. Kita kita nyangu kat ndina maawupmba yelavita kwiligandi.

GODNA MBAAPMA NIMBA NDINYANGUNA MBANGI VLA LIGANDI

¹² Ndinyanguna mbangi kita. Mbangimba liga nda nima sakwat nda tiga. Kraistna mbaapmamba liga nimba ndino wupma ligandi. Kita mbaapmamba liga nimba ndi nima sakwat nimba kapma kapma nimba ndi. ¹³ Godna waagan nina maawupmba ngwandindi maa Godna mbaapma nin aywaa wuleinin. Nina nat nimba Juda ndi ta tamba. Nat nimba Juda ana ndi ta tamba. Nat nimba njivwa kwo kwuka wenga ana klaa lindi tat ta nimba. Nat nimba ndina maawupmba yelavitinja vapmba yetilindi tamba. Nin aywaa Godna waagan klalaa kitamba yisolaa liganin. Tiga liga Godna waagan nin kat ava kwiligandi.

¹⁴ Nina mbangi kita nda mina ana ligandi. Nima sakwat nda ligandi. ¹⁵ Kita nyana man wupma

wandi. Wun man wun. Taamba ana wun. Ngi kat tiga mbangimba liga nda ana wun waa wandeyan woseka waigandi. ¹⁶ Kita nyana waan wupma wandi. Wun waan wun. Mini ana wun. Ngi kat tiga mbangimba liga nda ana wun waa wandeyan woseka waigandi. ¹⁷ Kita nyana mbangi mini mina lindeyan anda waamba waan wukkiyandi. Kita nyana mbangi waan mina lindeyan anda ndaamamba njaangu wukiyandi. ¹⁸ God wupma ana mbangi kwutndi. God ndina maawupmba yelavita mbangina mandit mandit nda kwutaa taagandi. ¹⁹ Mbangi nda aywaa kita vapmba tindeyan nina mbangi ana njivwa kwukiyandi. Kavle yigiyandi. ²⁰ Nina mbangi wupma ana ligandi. Nina mbangimba liga nda mandit mandit nda liga kita mbangimba.

²¹ Mina wun kapma liga apma vat tigiyouwun waa taamba kat ana waigandi. Nambu wun kapma liga apma vat tigiyouwun waa man kat ana waigandi. Aywaa njivwa kwutigandi. ²² Mbangina nat nda kat yelavika liganin. Wan nda nima njivwa ana ligandi waa yelavika liganin. Wan yelavika lina vak ana nglaatndi. Wan nda tilapman yindeyan nina mbangi kavle yigiyandi. ²³ Nina mbangimba liga kavle nda kat yelaga liganin. Nat mbangimba liga nda kavle savle tindangat kwunatiganin. ²⁴ Mbangimba liga apma nda nat samat ana kwunaka yelaga liganin. Wan nda tamba apma vat tigandi. Nin mbangimba liga lnda apma nda kavle nda God waa nyaangimba tigandi. Kavle yelaga linan kat waligandi God. ²⁵ God manda kat mbangi

wan vapmba kwutndi. Mbangina nda aywaa awat sowat kwunaka linjangat kwutndi. Ana awat sowat viyaigandi. ²⁶ Nina mbangi kita nda kangit yindeyan mbangi aywaa kangit yigiyandi. Mbangina kita nda apma vat tindi vineya mbangi aywaa wiyo waavi taagiyandi.

²⁷ Nino aywaa Kraistna mbangi vla lindi, ligani. Nin aywaa kita kita ndina mbangina nda vla ligani. Ndina mbaapmamba liga kita nyana mbangi vla ligani. Ndina mbaapmamba liga kita nyana mbangi vla ligani. ²⁸ Godna mbaapma nimba ndi kat kapma kapma njivwa kwilindi. Tat aposelno njivwa kwukiya nimba kat taagandi. Ngini ndina nyaangit mbukiyaa nimba kat taagandi. Ngini nat nimba kat ndina vat simogwigiyaa nimba kat taagandi. Kwunatinja njivwa kwutiga nimba kat kwunakaiya nimba kat ngini taagandi. Nat nimba kat miwa yilaa ndina njivwa kitamba kwukiya nimba kat ngini taagandi. Kan vapmba njivwa kwuka yeti ngwula wandeya nimba kat ngini taagnadi. Mandip mandip ngepma kwundimba ngambuga yetigiyaa nimba kat ngini taagandi. ²⁹⁻³⁰ Godna mbaapmamba liga nimbo aywaa apsoelna njivwa ana kwutigandi. Ndi aywaa God waa nyaangit ana mbutigandi. Ndi aywaa God tiga vat nat nimba kat ana simogiligandi. Ndi aywaa kwunatinja njivwa ana kwutigandi. Ndi aywaa yelogwengat tiliga nimba kat ana kwunatigandi. Ndi aywaa yelogwengat tiliga nimba kat ana kwunatigandi. Ndi aywaa mandit mandit ngepma kwundimba ana ngambuligandi. Ndi aywaa mandit mandit kwundimba ngambulinja vat wu-

taa ana ndina ngepma kwundimba mbutigandi.
³¹ Ngwuk Godna waagan apma glei da klavak
 nimamba yelavik ngwula. Apma glei vak ngwuk
 kat mbupmat yigowun. Awuk ngwula.

13

NAT NIMBA KAT NIMA MAAWUT YELAVIKA LINEYA VAT

¹ Kapma kapma ngepma kwundimba
 ngambuga nyinangwupmba liga enselna ngepma
 kwundimb ngambuga nat nimba kat nima
 maawut yelavitapman yiweyan wan apma vat
 ana dni. Wan ngambuweya nyaangit angwa
 kai. Mi viyaga belo viyaga kwo viyalinja vak
 vla ligiyandi. ² Nat nimba kat Godna nyaangit
 mbuka Godna maawupmba yelavika pogwulaa
 linda vak kat vilaa wun nima sakwat vak viga
 apma nambuo liga nyan vla liga nima avo liga
 mduwi kat nat kavat ay waa waweyan yigiyandi.
 Wun apma liga nyanat tiga nat nimba kat nima
 maawut yelavitapman yiweyan wun kl wo nyan
 vla ligiyowun. ³ Wuno kwanda kwanda nda
 aywaa kwo liga nyan kat kwiga wuna mbangi nat
 nyan kat tiga kwiwun, yamba tunjangat kwiga nat
 nimba kat nima maawut yelavitapman yiweyan
 wan yiluwa vat wun kat ana kwunakiyandi. Kwo
 vatnat tigiyandi.

⁴ Nat nimba kat nima maawut yelavika liga
 nyan ana kwiyatapman kimbut yiga ligandi. Nat
 nimba kat apma vat yiligandi. Ana tipmwigwula
 yiligandi. Wun apma nyan wun waa ana
 yelavikiyandi. ⁵ Wan vak kat yelavika liga nyan
 nat nimba kat ana kavle yiligandi. Ndina nda kat

mina ana yelavika lililgandi. Ndina maawut ana nyaingi yiligandi. Nat nimba ndi kat kavle vat yinjeyan ndi ana ndi kat awat kavle vat yigiyandi. ⁶ Nat nimba kavle vat yinjeyan wan vak kat vilaa ndi ana woviyaguga ligiyandi. Apma vat yinjeyan ndi vilaa woviyaguga ligiyandi. ⁷ Nat nimba kat kavle vat yinjeya vak kat vilaa nat nimba kat ana mbutigandi. Nat nimba kat vilaa ndi kavle nimba ndi waa ana waligandi. Ndi kat vilaa yelavitigandi. Ndi yetiga liga ngini apma vat anagandi ligiyaa. Nat nimba ndi kat nima vat kavle vat yinjeyan ndi ana nimamba kavle vatna waligandi.

⁸ Nat nimba kat nima maawut sika yelavika lineya vat ana ngiligiyandi. Godna nyaangit mbutina vat ngini ngiligiyandi. Ngini tiga kapma kapma kwundi ngambuga lina vat ngiligiyandi. Save klalinja vat apma nambo lilina vat ngini ngiligiyandi. ⁹ Kan mbambala apma nambo lilina vat aywaa ana klaliganin. Godna nyaangit mbutina nyaangit aywaa ana mbutiganin. ¹⁰ Tiga liga ngini njambwi nyan ngaga yandi maa viga yelavika ligiyanin. ¹¹ Tat nat nyan tiwan mat nyangu yeta vak vla yetiwun. Mat nyangu ngambula vak vla ngambuga yetiwun. Mat nyangu yetiga nambu klalinja vak vla klaliwun. Mbambala tamba nima nduat tigowun. Ngi kat tiga mat nyangu ta vla tuwa vat tamba kwagalawun. ¹² Mbambala kipmamba linan Godna angwa vat ana viliganin. Ndina kait vla mina viliganin. Ngini nyinangwut wokelaa ndina mindama viga ndina tinda angwa vat vigiyanin. Nin kat viga linda vak vla ngini ndi kat vigiyanin. ¹³ Ngililapman yeigyaa vak kuvuk tigandi. Wan vak kingiyan

ngwuk kat mbupmat yiwa. Godna nyaangit wutaa maawupmba yelavika kwutaa lina vat. God nin kat apma vat yindeya vak kat kawiga lineya vak. Nat nimba kat nima maawut yelavika lineya vat. Wan vak kuvuk ana ngiligiyandi. Wan vakna njambwi liga vat nat nyan kat nima maawut sika yelavika lineya vat.

14

MANDIT MANDIT NGEPMAN KWUNDIMBAN NGAMBUNJAN VAT

¹ Nat nimba kat nima maawut yelavika lingweya vak klavak kat yelavik ngwula. Godna waagan kwiliga vak kat aywaa ngwuk klavak kat yelavik ngwula. God waa nyaangit nat nimba kat mbukngweya vak ngwuk klavak kat nimamba yelavik ngwula. ² Kapma kapma kwundi ngambuliga nyan ndinyangu kat ana ngambuligandi. Ndi God kat mina ngambuligandi. Ngambulinda nyaangit nat nimba ana wutigandi. Ndi kapma kwundimba ngambuligandi. Godna waagan ndina maaawupmba ngwandindi maa pogwuga nyaangit ngambuligandi. ³ Ndina angwa kwundimba God waa nyaangit mbutiga nyan ndina maawut kwunakiyandi. Ndina nyaangit wutaa ndi kat vat yiliga nimba kat ana vaakiyandi. ⁴ Kapma kapma kwundi ngambuliga nimba ndi avla ndina maawut mina kwunatigandi. Ndina angwa kwundimba God waa nyaangit mbutiga nimba Godna mbaapmamba liga nimbana maawut aywaa ndi kwunatigandi. ⁵ Kapma kapma kwundimba ngabungweya vak kat wutaa ngwuk kat woviyaguga ligiyowun.

Ndina angwa kwundimba God waa nyaangit mbutiga nyan kapma kapma kwundimba ngambuliga nimba kat ndi kwulatigandi. Kapma kapma kwundimba ngambuliga nimba kat ndi kwulatigandi. Kapma kapma kwundimba mbutinja nyaangit dni aywaa wutaa ndina ngepma kwundimba mbutindeyan wovuna. Aywaa wuka ndina maawupmba yelavika aywaa kwutaa ligiyandi. ⁶ Kita mbaapmamba lina, ngwutnai liga kava yalaa kapma kapma kwundimba mbukweyan ngwla maawut ana kwunakiyandi. God waa nyaangit ngwuk kat mbukweyan ngwula maawuk kat God kwunakiyandi. Apm nambu lilinja nyaangit mbukweyan God ngwuk kat kwunakiyandi. Godna waagan simogwiliga nyaangit mbukweyan God ngwuk kat kwunakiyandi. ⁷ Waavi waga gita viyaga mandip mandip vapmba yindeyan wukia nimba waigandi. Anda mbangu kwundi yaa waa wutaa waigandi. ⁸ Walea linja tavik simblan sinjeyan wutaa nimba walea linja nimbi nda ana yiga klaigandi. Ndi woseka waa sindi? Waa yelavikiyandi. ⁹ Nyaangit mbutinja vak vla ligandi. Kapma kapma kwundimba ngambulinjeyan ana wukiyandi. Kapma kapma kwundimba ngambulinjeyan ndinai ngambuliga nyaangit kwo vatnat tigiyan. ¹⁰ Wan tina kipmamba kapma kapma ngepma kwundi nima sakwat tigandi. Wan kwundi aywaa maawut sika ligandi. Simblan ana ngambuligandi. ¹¹ Nat nyan kapma ngepma kwundimba mbutndeya nyaangit ana wukiyowun. Wutaa wiagowun. Ndi kapma ngepma nyana. Kapma kwundimba

ngambuligandi waa waigowun. Ndino wun kat wutaa wupma waigandi. Ndi kapma ngepma nyana waa waigandi. ¹² Ngwuk Godna waagan ngwuk kat kwiliga vak kat klavak yelavika ligangwuk. Godna mbaapma nimba kat kwunakngweya vak kat Godna wagananamba wagala ngwula.

¹³ Kapma kapma kwundimba ngambuliga nyan God kat wagalagiyandi. Wun kat simogwimin mala ndi kat wan nyaangit ndina ngepma kwundimba mbukiyowun waa wagalagiyandi. ¹⁴ God kat kapma kapma kwundimba ngambuweyan wan nyaangitna angwa ana viga ligowun. Kwo wuna maawupmba mina ngambuligowun. ¹⁵ Anda vapmba yiwun wunai yigiyaa vak apma vapmba tigiyan. Apma vat kingiyan. Nyaangitna angwa viga lilapman tiga ana God kat ngambugiyowun. Nyaangitna angwa viga lilapman tiga ana God kat wuna kwundimba mbangu kwundi waigowun. ¹⁶ Maawut yelavitapman tiga God kat sivu kingweyan ngwutnagwi liga nyan ana wuka yelavikiyan. Wutaa apma vat wangwuk waa ana waigandi. ¹⁷ Kapma kapma kwundi ngambuga God kat sivu kingweyan wan vat nat nyana maawut ana kwunakiyan. ¹⁸ Ngwuk kita vililik njambi kapma kapma kwundimba ngambuligangwuk. Wun njimbla njimbla kapma kapma kwundimba ngambuligowun. Ngi kat tiga God kat sivu kiligowun. ¹⁹ God kat yelavipmak yalaa yisolaa lingwuk maa wuleilaa sivla nyaangit kapma kapma kwundimba ngwuk kat ana ngambugiyowun. Samat nyaangit nat nimba

kat apma nambu kwigiyandi. Yelavika liwa vat kupma ligandi.

²⁰ Wuna mbaapmamba liga nimba maawut sitapman mat nyangu liga vla ke lingweya. Nima nyangu yelavika liga vat vla tigiayangwuk. Mat nyangu kavle vat ana yelavitiigandi. Wupma ngwutno mat nyangu liga vat vla ligiyangwuk.

²¹ Tamba la nimba God waa nyaangit tamba piliwutndi. Wowun maa kpma kwundimba ngambuga yetiliga nimba kapma ngepma nimba wuna nyaangit wan nimba kat yalaa mbukiyandi. Ndi ana wukiyandi. Kai waigandi wuna nyaangik kat waa wandi God waa tamba piliwutndi.

²² Kapma kapma kwundimba ngambungweyan God kat kai waliga nimba vilaa yelavika waigandi. Ndi Godna kwondumba ngambuligandi waa waigandi. Ndina ngepma kwundimba God waa nyaangit ngambungweyan Godna mbaapma nimba vilaa yelavika waigandi. Ndi Godna kwondumba ngambuligandi waa waigandi. God kat kai waliga nimba kat vilaa wupma ana waigandi.

²³ Ngwuk yisolaa liga kita kita nyan kapma kapma kwundimba ngambulingwuk maa kwo liga nyan wuleilaa vilaa waigandi. Ndi tungwengwan yiga ngambuliga nimba vla ligandi waa waigandi.

²⁴ Ngwuk yisolaa liga God waa nyaangit ndina ngepma kwundimba ngambulingwuk maa kwo liga nyan wuleilaa wutaa maawupmba yelavika apma nyaangitna ngambulinja waa waga kupi maawut yelavikiyandi. Wun kavle vat yiga yetiligowun waa yelavika ligiyandi. ²⁵ Wuna maawut kavle

savle lindeya vak kat tamba vigowun waa yelavika ligiyandi. Ndi nambu silandalaa tiga God kat yelavikiyandi. Ndi ngwuk kat waigandi. God ngwutnogwinala ligandi waa waigandi.

GOD KAT YELAVIPMAK YISOLAA LINGWEYA VAT

²⁶ Kita mbaapmamba lina nimba kupma kwukngwangat woviyaguga ligowun. God kat yelavipmak yisolaa lingweya njimbla ngwula kita nyan laataa mbangu kwundi waigandi. Nat nyan laataa nyaangit visimogwigiyandi. Nat nyan Godnanamba wuta nyaangit mbukiyandi. Nat nyan laataa kapma kapma kwundimba ngambugiyandi. Nat nyan laataa ngambundeya kwundi wutaa ngepma kwundimba bukiyandi. Ndi aywaa yilinja vat awat sowat kwunatnjeja vat mina ligiyandi. ²⁷ Kapma kapma kwundimba ngambuvat yingweyan vililik pali o kuvuk nyangu mina kita kita laataa ngambugiyandi. Ngambundi maa nat nyan laataa ngwula ngepma kwundimba mbukiyandi. ²⁸ Ngepma kwundimba mbukiya nyan tilapman yindeyan ke kapma kapma kwundimba ngambuga. Ngwuk kapma liga God kat kapma kapma kwundimba ngambugiyangwuk. ²⁹ God waa nyaangit wutaa vililik pali o kuvuk nimba laataa mbukiyandi. Nat nimba ndaaliga wuka siga naguga ligiyandi. ³⁰ Ndaa liga nimbana kita nyan God ndi kat mbutndi maa ndi laakiyandi. Ndi laatndi maa mbutiga nyan ndaa ligiyandi. ³¹ Ngwuk kita kita laataa God waa nyaangit aywaa mbukiyangwuk. Ngi vapmba mbutingweyan apma maawut klalaa apma nambuo ligiyangwuk. ³² God

kita nyan kat nyaangit mbutndeyanndi wan nyan maawupmba yelavitaaw wan nyaangit nat nimba kat mbukiyandi. ³³⁻³⁴ Simblan ana laataa mbukiyandi. God wan vak kat kai waligandi. Kita kita laataa apma vat savagu liga vapmba mbukiyandi. God kat yelavipman yisolaa lingweya njimbla taagawa ana laataa nyaangit mbukiyandi. Godna nimba aywaa yisolaa wupma yiligandi. Juda ndino nimbun wupma yiligandi. Ndina nyaangit wandi. Taagwa ndi ndu kat ana njimbwi ligiyandi waa wandi Judana nyaangit. ³⁵ Mbutinja nyaangik kat wagalavat wanjeyan ndina ngay wuleilaa lan kat wagalagiyandi. Lan mbukiyandi. God kat yelavipmak yisolaa lingwa njimbla taagwa laataa mbutnjeyan wup yilinja vak vla ligandi. ³⁶ Ngwuk piliwutiwa nyaangipmba ana yetilingwuk. Ngwuk manda kat tiga kapma kapma vapmba yetilingwuk. Ngwuk Godna mbaapma tat wuleilaa la nimba ana ngwuk. Godna nyaangit ngwutnamba ana yalindi. Godna nyaangit klala nimba nima sakwatna ngwula kapma ana klaligangwuk.

³⁷ Ngwula nat nimba Godna waagan nin kat kwondu kwindi maa Godna nyaangit mbutiganin waa yelavitigandi. Ndi kat wowun. Wan piliwutuwa nyaangit wuna nyaangit ana ndi. Godna nyaagnitna wowun ngwuk kat. Ngwuk aywaa awuk ngwula. ³⁸ Kita nyan wan nyaangit wupmak kat kai wandeyan ndi ndina mala. Ndi kavle maawut yelavitaaw ligiyandi. ³⁹ Godna nyaangit mbutingwa vak klavak kat nimamba yelavik ngwula. Kapma kapma kwundi ngambulinja vak kat ke kai waa ⁴⁰ God kat

yelavipmat yisolaa yetingwa vat simblan ke yetingwa.

15

JISAS KIYALAA LAATNDA NYAANGIT

¹ Wuna mbaapmamba liga nimba ngwuk kat tak mbukwa apma nyaangit nat njambi ak ngwuk kat mbupmat yigowun. Tak wutaa ngwutna maawupmamba yelavika kwutaa lingwuk. ² Wan nyaangit wutaa kwutaa lingwuk maa God vilaa ngwuk kat kwunatndi. Ngwuk kat mbukwa nyaangit kwagalalapman yingweyan ngini God ngwuk kat apma vat yigiyandi. Wan nyaangit kwutaa liga kwagalangweyan kwutaa lingwa vat kwo vatnat tigiyan. ³ Wan apma nyaangit wutaa ngwuk kat mbutiwun. Wan nyaangit nima nyaangitna. Wan nyaangit kingiyan. Kraist nina kavle vak kat tiga kiyandi. Wan nyaangit tamba God waa nyaangit piliwuta nimba piliwutndi. ⁴ Ndi kat sindi, kiyandi maa waangumba taagani tiga nandinya kuvut tiga God wandi maa laatndi. Wan nyaangit nimbun tamba God waa nyaangit piliwuta nimba piliwutndi. ⁵ Samat tiga Pita ndi kat vindi. Tiga liga wan tamba vilikiyeli vililik ta ndina aposel ndi kat vindi. ⁶ Tiga liga nat nima sakwat nimba kita njambimba ndi kat vindi. Ndi ina sakwat 500 kat kwulatndi. Wan nima sakwat nimbana kuvut nimba wundumbu yindi. Nat nima sakwat nimba mbambala kwo yetiligandi. ⁷ Tiga liga Jems ndi kat vindi. Tiga liga nat aposel aywaa ndi kat vindi.

⁸ Ngini nglei wuno ndi kat viwun. Nat aposel tat vindi. Wun ndi kat ngini viwun. Nat aposel

njambwi nyan ndinogwinala liga aposelna njivwa agwuk ngwula waa ndi kat wandi. Njambwi nyan kapma kavamba liga aposelna njivwa agwup mila waa wun kat wandi. ⁹ Wun aposelna mbaapmamba ndina kwupmba liga nyan wun. Tat Godna mbaapmamba la nimba kat kavle vat ndi kat yiliwun. Ngi kat tiga manda kat wun kat njambwi nyan aposelna njivwa kwindi wun kat. Wun apma nyan ana wun. Ana yelavikowun. ¹⁰ God wun kat miwa yilaa wan njivwa awagapma kwindi maa wan njivwa kwutigowun. Wan aposelna njivwa kwutuwa vat nat aposel kat kwulaka kwutigowun. Wuna avamba ana kwulaka kwutigowun. Nima nyan God wun kat ava kwindi maa kwulaka kwutigowun. ¹¹ Wunogwi nat aposelo nin kita vat aywaa kita nyaangipmba mbutiganin. Wan apma wutaa maawupmba yelavitaaw kwutaa lingwuk.

KIYAA NIMBA LAAKIYAA VAK

¹² Ngwutna nat nimba waligandi. Kiyaa nimba ngini ana laakiyandi waa waligandi. Nin tak wupma ana walinin. Ndi manda kat mandit nyaangipmba waligandi. ¹³ Ndina kavle nyaangit wutaa wan nyaangit apma nyaangitna waa yelavitneyan nina nimbun waiganin. Kraist kiyalaa liga ana laatndi waa waiganin. ¹⁴ Kraist kiyalaa laatapman yigendan wan mbutina nyaangit kwo valat tigendi. Wan nyaangit wutaa yelavika kwutaa lingwa vat kwo valat tigendi. ¹⁵⁻¹⁶ God kwukna nda kat ngwuk kat woseka wagenin. Tak ngwuk kat walinin. God wandi maa Kraist kiyalaa laatndi waa walinin ngwuk kat. Kiya nimba laatapman yigenjan God Kraist

kat ana laak wandi, laakendi. ¹⁷⁻¹⁸ Kraist kiyalaa laatapman yigendan wan apma nyaangit wutaa yelavika kwutaa lingwa vat kwo valat tigendi. God ngwuk kat ana kwunakendi. Ngwuk kavle vapmba yetigengwuk. Kraistna mbaapmamba liga kiyaa nimba ana ngini laakendi. Ana God ndi kat ngini kwunakendi. Kiyaa nimba tat yelavitendi. God ngini nin kat kwunakiyandi waa yelavita kiyandi. ¹⁹ Kiyani maa Kraist nin kat laak ngwula waa ana waigandi waa yelavitneyan ana nglaatndi. Nin njimbla njimbla nglavile savle yetiligiyani. Nglaga yelavika yetilineya vak nat nimba kat kwulakiyandi.

²⁰ Tal kwiwa nyaangit apma nyaangit ana ndi. Kwo nyaangitna. Apma nyangit kingiyani. Kraist kiyalaa laatndi. Kiyalaa laatnda vak vla tamba kiyaa nimba aywaa laapgiyandi. ²¹ Kiyalina vat kita nyananamba yandi. Ndina si Adam. Kiyalaa laatneya vak ndino nimbun kita nyananamba yandi. Ndina si Kraist. ²² Adamna nyangu kiyanda vla kiyaigandi. Kraistna nyangu kiyalaa laatnda vla laataa apma vat tigiyan. ²³ Kraist nina njambwi nyana. Ndi tat kiyalaa laatndi. Nin ndina kwupmba liganin. Nino wupma kiyalaa laatnda vla laakiyanin. Ndina yaiga nandinyamba nin ndina nimba laakiyanin.

²⁴ Ngini la liga nandinya yaigandi. Wan nandinya Kraist ndina maama nimba kat kwulakiyandi. Ndi kat kai waliga nimba, kipmana njambwi nimba, kwonduo liga nimba ndi kat aywaa kwulakiyandi. Kraist ndi kat kwulataa God kat waigandi. Kwulakwa nimba ndi kat viga ligiyani waa waigandi. ²⁵ God wandi, ndi kat

kwulapmat Kraist njambwi nyanat tigiyaŋdi.
²⁶ Ndina maama nimba kat kwulataa kavle vak yiga kiyalina vak kat vasandagiyandi. ²⁷ God wandi maa Kraist nujambwi nyanat tiga ndina maama nimba kat aywaa vasandagiyaa vak kat tamba piliwutndi. Ndi wandi maa aywaa ndina njambwi nyanat tigandi waa tamba piliwutndi. Wan nyaangit vilaa nin yelavika liganin. Kraist Godna njambwi nyan ana ndi. God ndina njambwi nyana waa yelavika liganin.
²⁸ Kraist ndina maama nimba kat vasandalaa ndina njivwa ngiligiyandi. Ngilindi maa Godna kwupmba ligiyandi. Kraist Godna kwupmba lindi maa God njambwi tinda vak aywaa vigiyaŋdi.

²⁹ Ngwutna nat nimba kiya nimba kat tiga yelavita a ngu yagulindi. Kiyaa nimba ngini ana laakiyaŋdi waa yelavikngweyan ngwuk wupma manda kat ngu yaguligangwuk. Ana nglaatndi. ³⁰ Nino nimbun Godna nyaangit yi ya mbutiga nimba nin kat samat vatnya mina lindi. Nin ana nimamba yelavika liganin. Kiyaa nimba laakiyaŋdi waa yelavitiganin. ³¹ Wuna kita mbaapma nimba wun kat nima vat yelinja njimbla ana nimamba yelavika ligowun. Ngwuk kat yelavika ligowun. Jisas Kraist waa nyaangik kat maawupmba yelavika kwutaa lingwa vak kat yelavita a kiyavak kat ana vaatigowun.
³² Mbambala tiluwa ngepma Efesas walinja ngepmana nimba wun kat vilaa kwapimba yetiga nda kitinja vak vla wun kat kitindi. Ndinangwinala walea liwun. Kiyaa nimba ana laapgiyaŋdi waa yelavikewan ana nima njivwa kwuka njambwi nyana njivwa kwukewun ndi kat.

Kiya nimba ana laakiyandi waa waliga nimba kupma waligandi. Mbambala nin nina mbangi waliga vapmba yetigiyanin. Kinya anaganin kiyaigaa waa waligandi wan nimba.

³³ Wan walinja vak ana nglatndi. Wundi kavle vat waliga nimbonala yetinjgweyan ngwutna maawat kavle vak yelavikiyandi yelavitnja vak vla. ³⁴ Yetingwa kavle vak kwagalalaa apma maawut yelavika yeti ngwula. Ngwula nat nimba Godna angwa vat ana wuka ligandi. Ngwukat tat ana nyaangit wutaa nimamba wup yigiyangwuk.

KIYA NIMBA LAATAA MANDIP MBANGI KLALAA LIGIYANDI

³⁵ Ngwula nat nimba wagalaligandi. Kiyaa nimba anda vapmba laakiyandi. Laataa nada mbangi klalaa ligiyandi waa wagalaligandi. ³⁶ Ndi tungwengwan yiga liga wagalaligandi. Kapma kupi mbangi klanjeya vat mi sik tulinja vak vla ligandi. kipmamba vaangundi ma njangu veilaa kandi mi vla laakiyandi. ³⁷ Kipmamba tulinja mina sik vla ligandi. Njingwut ngaanga avamba ana tuligandi. Nima sakwat mi sik yuwi sik vla tuligandi. ³⁸ Sipmba tunja nda kat God wandi maa ava ngaanga tiligandi. Nat mi sik nat ngaanga nat ava vla liligandi. Nat mi sik nat ava nat ngaanga vla liligandi. Wan vak Godna yelavik vapmba ligandi. ³⁹ Yuvut yiliga nda nimbun ndino nat mbangi nat mbangi vla ligandi. Ndinyangu nat mbangi. Kwapimba liga nda mandip mbangi nda liga. Waavi mandip mbangi. Ngumba yetiliga nda ndino mandip mandip mbangi ligandi. ⁴⁰ Kipmamba liga nda

nyinangwupmba liga nda mandip mandip nda. Nyinangwut kwutaa nyinangwupmba God yelaga nda nat nda. Kipma kwutaa kipmamba God yelaga nda nat nda. ⁴¹ Nya mandit yelaga nda. Mbap mandit yelaga nda. Singwut mandit yelaga nda. Singwut nima sakwat tindan mandit mandit yelaga nda ligandi. Wan God kwukna yelaga nda vilaa God nima nyana waligandi. ⁴² Kiyaa nimba laatinjeyan ndino wupma ligiyandi. Kipmamba linjan mbangi kiyandi maa waangumba taagandi tamba mbrendi. Ngini laataa mandip mbangi njimbla njimbla tigiya mbangi klalaa tigiya. ⁴³ Waangumba vaangunja mbangi apma mbangi ana ndi. Ava ana ligandi. Ngini laatindeyan wan mandip mbangi apma mbangi tagula ava liga mbangi klalaa njimbla njimbla tigiya. Yelaga liga mbangi ligiyandi. ⁴⁴ Waangumba vaangunja mbangi kipmana mbangi. Ngini laatindeyan wan mandit mbangi klalaa nyinangwupmba tindeya mbangi. Ngwut viga ligangwuk. Kipmamba liga nimba aywaa mbango ligandi. Kiyalaa laataa nyinangwut wokelaa mbangi lapman tigiyanin waa manda kat yelavitigangwuk. Mandit mbangi klalaa nyinangwupmba ligiyandin.

⁴⁵ Tamba la nimba God waa nyaangit piliwutndi. Tat ta nyan Adam God ndi kat kwutndi maa tiga nin kat njandi maa nima sakwat yilaa kipmamba tiganin waa tamba ta nimba piliwutndi. Adamna kwupmba ya nyan Kraist njimbla njimbla nyinangwupmba apma vat tineya vat kwivat yandi. ⁴⁶ Tat kipmana mbangi klalaa kipmamba liga ngini nyinangwupmba njimbla njimbla lineya apma mbangi klaiganin. Apma mbangi tat ana

klaiganin. ⁴⁷ Tat ta nyan Adam kat God kipma klalaa kambundu kwutndi. Adamna kwupmba yaa nyan Kraist ndi nyinangwupmba liga yandi. Tat ya nyan kipmana nyana. Ngini kwupmba ya nyan nyinangwupmba liga ya nyana. ⁴⁸ Kipmana nimba aywaa Adam yeta vak vla yetiligandi. Nyinangwupmba ligiyaa nimba aywaa Kraist tiga vak vla yetiligiyandi.

ANGWA NYAANGIT

⁴⁹ Mbambala kipmamba lina Adam ta mbangimba liganin. Ngini kiyalaa laatneyan Kraist tiga mbangimba ligiyandin. ⁵⁰ Kita mbaapmaba liga nimba, mbutiwa nyaangitna angwa kingwiyan. Kipmamba liga kipmana vapmba yetiliga nimba nyinangwut ana wuleigiyandi. Kipmamba kwutaa mbango liga nimba njimbla njimbla wan mbango liga ana yiga nyinangwupmba tigiyan. ⁵¹ Pagwula la nyaangit ngwuk kat mbambala mbupmat yigowun. Nin aywaa ana kiyaganin. Nina nat nimbo kiyalapman tiga mandip mbangi klaigandi. ⁵² Kwik kwiknala vilinja vap vla kwiyatapman kaligandi. Nyinangwupmba liga yaiga kwutna kwundi wutaa mandip mbangi klaigandi. Wan ngini ligiyaa nandinya kwutna kwundi wutaa kiyaa nimba mandip mbangi njimbla njimbla linjeya mbangi klalaa laakiyan. Kwo liga nimba ndi mandip mbangi klaigandi. ⁵³⁻⁵⁴ Wan njimbla kipmana mbangi mbredeya mbangi kwaglalaa njimbla njimbla tinjeya mandip mbangi klaigandi. Kipmamba liga kiyalinja mbangi kwagalalaa ngini nyinangwupmba linjeya apma mbangi klaigandi.

Tamba piliwutndi. Kiyalina vak kat tamba ngililndi. Wan kavle vak kat tamba kwulatnɪn waa tamba piliwutndi. Piliwutnja nyaangit wan yaiga njimblamba viga wutaa waigandi. Tamba la nimba woseka waa ana piliwutndi waa waigandi. ⁵⁵ Nat tamba la nyan piliwutndi. Kiyalinja vak nɪn kat ana kwulaiyandi. Kiyavak kat ana vakiyanɪn waa piliwutndi. ⁵⁶ Manda kat ana vaakiyanɪn. Tat kavle vat yiga yetilinangat kiyalinɪn. Wan kavle vat God tamba limbwindi. Tak Godna lo vilaa nɪn kavle vak yiga yetiliganɪn waa vilinɪn. Ngi kat tiga kiyavak kat ana vaatiganɪn. ⁵⁷ Ngi kat tiga God nɪn kat apma vat yinda vak viliganɪn. yindangat ndi kat sivu kiliganɪn. Nina njambwi nyan Jisas Kraist kiyalina vak kat kwulapmat yandi. Ngi kat tiga nɪn kiyavak kat ana vaatiganɪn.

⁵⁸ Ngi kat tiga wuna mbaapmamba liga nimba ke vaaka yelavika. God waa nyaangik kat ngwutna maawupmamba yelavika kwutaa ali ngwula. Njambwi nyana njivwa nimamba kwuka liga kiyalaa laakngwuk maa ngwuk kat nima wenga kwigiyandi. Ana ndina njivwa kwo kwukiyangwuk.

16

SANYA YISOGA TAAGLINJA VAK

¹ Sanya kita livwimba yisoga taagangweya vak kat mbupmat yigowun. Yisogi taagalaa Judia walinja kipmamba liga Godna mbaapma nimba kat kwigiyangwuk. Tak Galesia walinja ngepmamba liga Godna mbaapma nimba kat sanya yisoga taagalaa agwi ngwula wowun. Ngwulo

nimbun ngwuk kat wowun. ² Sande sande ngwutna nat kuvuk sanya yisoga taagagiyangwuk. Nima sakwat sanyo liga nyan ndi nima sakwat taagagiyandi. Kuvuk sanyo liga nyan ndi kuvuk taagagiyandi. Wan vak yingweyan ngwutnai liga kava yawun maa sanya kita livwimba ligiyandi. Ngwutnai liga kava yalaa ngwuk sanya yisoga taaga ngwula waa ana waigowun. ³ Ngwutnai liga kava yawun maa wan sanya Jerusalemat kaligiyaa nimba kat waingangwuk. Jerusalemba liga nimba kat piliwukweya pas kwutaa kaligiyandi. ⁴ Jerusalemba kwukweya njivwa lindeyan yigiyowun. Jerusalemat yiweyan wunogwinala yaigandi.

POL NDI KAT VIVAT WANDI

⁵ Wan masedonia walinja kipmamba liga nimba kat yiga vilaa ngwuk kat yaigowun. ⁶ Ngwutnagwinana samat tigiyowun. Yipma yiliga njimbla yetigiyowun ngwutnoginana. Ngwutnogwinana tiga liga ngwuk kat kwagalalaa yiweya yambi kwunakiyangwuk. Ngwuk kat kwagalalaa yiweya kava ana viga ligowun. ⁷ Ngwuk kat yaa vilaa kwiyatapman ngwuk kat kwagalavak kat kai wowun. Njambwi nyan kai wandeyan ngwutnogwinala ana yetigiyowun. Wuna maawut nima njimbla tivak kat yelavitigowun. ⁸ Wan tiluwa ngepma Efesas walinja ngepmamba tiga Pentekos walinja pesto vigiyowun. ⁹ Wuna nima sakwat njivwa kumba ligandi. Nima sakwat nimba God waa nyaangit wupmat waligandi. Aywaa kai. Nat nimba wun kat walea ligandi.

10 Timoti ngwulai liga kava yandeyan ndi kat kwutaa ngwutna ngayat kalilaa ndi kat kiginda agwi ngwula. Ndi njambwi nyana njivwa kwutigandi. kwutiwa njivwa vla kwutigandi. 11 Ndi kat vilaa mat nyana kwo nyana waa ke waa. Ndi kat kwunak ngwula. Ngwuk kat kwagalalaa at wunai liga kavat yaigandi. Nina mbaapma nimba nat nimbonala yaigandi Timoti. 12 Nina mbaapmamba liga nyan Apolas ndi kat nat nyaangit wungi liga. Tat ndi kat wowun. Nat nimbonala Korinmba liga nimba kat yiga avi waa wowun. Mbambala nglei ndina yelavik vapmba yivak wandi. Mbambala yindangat God ndi kat kai wandi. God ndi kat kwiya njivwa ngilindeyan yigiyandi.

NGINI LA NYAANGIT

13 Ngwuk yigumba vigiyan gwuk kavle vak kat. God waa nyaangit maawupmba yelavika kwutaa lingwa vak ke kwagalaga. Nat nimba kat ke vaaka. Tagula maawut yelavika ali ngwula. 14 Kwutingwa njivwa aywaa nat nimba kat nima vat yelavika agwuk ngwula.

15 Nina kita nyan kat Stefanas nino ndina ngayamba liga nimba kat viga ligangwuk. Wan nimba tak Godna mbaapma wuleindi. Akaia walinja nima kipmamba liga nat nimba ndi kat ana kwulatndi. Ndi tat wuleindi. Ndi Godna mbaapma nimba kat kwunatigandi. 16 Ndina nyaangit awuk ngwula. Ndina kwupmba ali ngwula. Ndinogwinana kitamba njivwa kwutaa nimbana nyaangitno awuk ngwula.

17 Ngwutnai la kavamba la ndi kuvuk nimba Stefanas, Fotypeunetas, Akaikas wunai liga kavat yandi. Yandi maa solat siwun. Ngwut Korina nimba wunai liga kavamba ana ligangwuk. Wun kat kwunapmak walingwa njivwa ndinalak klalaa wun kat kwunapmak yandi. 18 Wuna maawut kwunatigandi. Tak ngwutna maawut kwunatindi. Ngi kat tiga ndina si kwusogiyangwuk wundigi nimba kat. 19 Esia walinja nima kipmamba liga Godna mbaapma nimba ngwuk kat apma nandinya waligandi. Akwilagwi Priska ngwuk kat apma nandinya waligambit. God kat yelavipmat mbitna ngayimba yisolaa liga nimba ndino nimbun ngwuk kat apma nglei nandinya waligandi. 20 Wunai liga kavamba liga Godna mbaapma nimba ndino apma nandinya waa waligandi. Awat sowat taamba agwut ngwula.

21 Tak mbukwun maa piliwutnda nyananamba pensil klalaa wuna taambamba apma nandinya waa piliwutigowun. 22 Kiga nyan nina njambwi nyan kat kai wandeyan wan nyan kavle yigiyandi. Nina njambwi nyan yaigandi.

23 Nina njambwi nyan Jisas awagapma nin kat apma vat yilinda vak klangwangat wowun.

24 Ngwuk Kraist Jisasna mbaapma nimba ngwuk kat woviyaguga ligowun. Ngiyambak.

GOD WAA NYAAGIT
The New Testament in the Iatmul Language of Papua
New Guinea
Nupela Testamen long tokples Iatmul long Niugini

Copyright © 1975 Bible Society of Papua New Guinea

Language: Ngepma Kwundi (Iatmul)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-12-13

PDF generated using Haiola and XeLaTeX on 11 Nov 2022 from source files dated 9 Oct 2020

b9b92e46-2e7b-584e-a145-60c7cfcc1e68